


廣州府志

ル 5

1212

31

0 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31



凡 58  
1212  
卷 31



廣州府志卷八十二

前事畧八 國朝

國朝

咸豐元年春黃毛五等以次就擒磔之并戮其黨三月巡撫葉名琛還廣州令按察使祁宿藻留辦善後夏五月祁宿藻遷任江甯布政使新任按察使崔侗接辦秋七月事竣清遠志

夏旱南海志

九月清遠賊邱東培鄒大爪英等聚黨數百人在滘江大小窩佔踞民居十月知縣馬映階守備羅璋帶兵勇追至湯塘大埔田官軍失利復選精銳追至長甯瑤田獲賊百餘惟匪首未獲

冬十月香山九洲基有虎采訪冊

前事畧八

二年春正月迴岐禾谷嶺妖民李北養謀作亂知縣馬映階募勇搗其巢北養逸去清遠志

十三日龍門大風雨雹壞人畜傷田廬無算大木斯拔采訪冊

二月英德清遠餘賊李亞社等率眾焚擾龍門麻榨墟藍漢

山油田香溪藍涪鰲溪等處旋由張姑凹竄回博羅采訪冊

龍門增城大雨雹采訪冊

夏四月從化大水采訪冊

六月從化賊楊超冠六焚劫龍門永清油田龍華墟等處旋

竄至墨湖逕鄉勇邀而擊之擒斬無算采訪冊

賊首楊超冠六統黨數千由永清油田沿村焚劫至龍華

墟近墟之龍江繩武圍與舖戶聯絡奮力捍禦賊旋由墨

湖竄去時鰲溪把總譚鎮基陳朝陞監生譚吉熊帶勇在

墨湖逕伏截斃二十餘名越日在沙坊復斃賊多名壯勇

陣亡者陳渭賢阮進華陳正端譚郁章譚綸多譚兆成譚

佐常李桂華黃植蔡譚履亨凡九人鄉民建祠祀焉楊超

冠六後逃至廣州為官軍所獲磔于市時又有別隊賊首

潘姓者由黃窰峒竄擾西溪石蓮牛皮嶺及從化龍頭地

方會大吏遣武弁黃者華張開平知縣王銘鼎剿之賊乃

敗滅采訪冊

秋八月新會白石鄉雨血采訪冊

十六日新會禮義都演劇失火場中焚死男子一百一十餘

人婦女九十餘人新會續志

冬十月西潦至晚穀少收新會續志

十一月長甯賊陳邦陶等百餘擾掠龍門梅派麻埔等處為

鄉民堵截竄回長甯采訪冊

三年春二月博羅賊張觀秀等二百餘竄入藍漢山劫掠采訪冊

二十九日從化賊胡亞勝等竄踞龍門左潭墟知縣喬應庚遣縣丞張志德生員譚和光追剿之賊始遁去采訪冊

三月龍門雨土采訪冊

夏五月大水南海志

六月長甯賊首陳亞盈余亞黃等統黨千餘人入龍門縣境劫掠鄔村田尾劉村等處知縣喬應庚復遣張志德譚和光武生陳安邦等帶勇前往田尾堡之寒塘與賊力戰卻之采訪冊

秋八月十五日東莞縣賊萬雞仔任攻擾虎門寨城官軍擊

退之采訪冊

時知縣華廷傑會同都司何泰鵬統兵由陸路前進與賊戰于城外東較場適參將潘慶復帶師船由水道入賊大驚潰未幾旋獲萬雞仔任於縣屬誅之采訪冊

九月東莞賊尹殿扳伏誅采訪冊

尹殿扳東莞司馬鄉人於九月初聚眾滋事總督檄知縣華廷傑隨知府陶澐副將黃失名暨同知王治溥歸善縣海廷琛都司何泰鵬千總伍雲中潮州營弁各官等前往查辦逆首尹殿扳率眾拒捕王治溥何泰鵬伍雲中俱遇害海廷琛身受重傷潮州員弁亦多死者至是廣州府郭超凡等提兵往勦先後擒獲逆賊多名并將尹殿扳送省正法地方始靖采訪冊

佛山雨血

南海志

冬十月十七日增城客賊李乙秀等作亂

采訪冊

逆首李乙秀李亞廣羅亞記謝亞記關亞水李亞秀李亞奎李亞二等聚眾在筋竹坑作亂汀塘紳士彭聖典等飛報邑城知縣倪森遣差役馳往彈壓被該逆等支解祭旗連日復劫汀塘西湖坳等處二十八約紳士姚壯充潘榕尹光照彭士元等率眾堵禦破賊于濱圳山下斬首七十餘級生擒羅亞記正法餘黨奔散地方始安

采訪冊

四年春花縣泮岷村雌雞化為雄

采訪冊

夏五月紅巾賊起

采訪冊

先是粵省莠民聚眾拜會其黨分布各州縣約期皆反四月東莞賊何六首擾石龍墟未幾陳開等亦在佛山倡亂

而省城北李文茂甘先周春陳顯良

混名豆皮大

等聚眾佛嶺

市應之還逼省城又有林洗滌李大計屯省河之南水賊關巨何博份等沿海攻掠此外如陳松年呂萃晉等起新會陳吉梁楫等起順德陳金釭練四虎等起清遠高六鄒新蘭等起龍門其餘嘯聚黨羽私相部署者不可勝紀從逆者裹紅巾服梨園衣冠造洪順堂洪義堂印設將軍元帥先鋒軍師偽號名其黨曰洪兵官軍麾用白賊遂名

白兵

采訪冊

賊何六逆黨劉英才擾增城糾黨數千由福和到二龍墟劫掠韓村等處

采訪冊

賊何六遣偽帥劉英才統賊由博羅入縣奸民沿途蟻附所過焚劫一空六都團練紳士陳維嶽尹承先等督勇堵

剿頗有斬獲嗣後誘脅日眾賊勢張甚朱真社等聚甯都何漢容出沒石灘陳旭何太康橫行河面梁喜中煽惑城中皆遙推何六為之首由官海至新塘賊船綿亘數十里眾號十萬采訪冊

二十二日賊何六陷東莞縣采訪冊

奸人通賊導陷縣城都司莫其亮死之知縣江肇恩典史張玠均奉

旨革職

六月初一日巡捕黃者華勦東莞賊何六于新塘十字滘與戰破之采訪冊

初五日都司鍾金聲把總劉秉勝會同衛佐邦水師擊猛涌賊林泚滢行至塘步遇賊劉秉勝陣亡衛佐邦鍾金聲退還

番禺志

先是三月間三山滘口大石會岡猛涌等處有賊劫掠紳士何若瑤武弁王振高等設船搜捕都司衛佐邦復遣兵五百至大石賊徒遂散至是林泚滢復聚黨猛涌番禺志

初八日官軍收復東莞縣采訪冊

時知縣華廷傑再回本任會同紳士何仁山等聯集鄉村籌辦團練眾心遂安采訪冊

十二日佛山賊首陳開豎旗于義清岡作亂采訪冊

陳開者佛山博徒也素無賴至是糾眾倡亂其黨封滿和尙能霍輝朱發等附之燒城門頭及大基尾官卡凶焰極

熾采訪冊

二十日賊首甘先等攻陷花縣采訪冊

逆賊甘先曹春林等於六月十九日在花縣遠龍墟豎旗  
 倡亂乘知縣程志簠病故襲陷縣城典史章志榮千總胡  
 騰高督兵巷戰身受重傷被鄉民救出陣亡故程合家人  
 五名縣役一名復焚劫獅嶺司巡檢衙署巡檢曹敬之次  
 女投水死又教諭張毓蘅之胞姊黃張氏妻母劉蔡氏均  
 罵賊不屈被戕甘先合賊黨曹春林盧亞起據橫潭墟設  
 糧臺勒收穀米解赴佛嶺市賊營其時據李溪石角等墟  
 者則有江受帶據炭步墟者則有任喧湯澤據獅嶺墟者  
 則有馮天馮鼎據赤坭白坭墟者則有楊南驕李馨方皆  
 以紅巾為號采訪冊

二十二日三水賊區球等擾楊梅墟紳士梁駒等擊之采訪冊

二十三日賊盧偉陳金釭等糾眾圍三水縣城知縣沈亨惠

都司黃曜吉等力戰禦之采訪冊

是年六月初二日范胡市陳金釭盧偉朱子儀等豎旗倡  
 亂據蘆苞都司署為賊巢七月初一日西南賊首鄧近歐  
 球等雲集響應知縣沈亨惠守備何雲章聞變戒嚴又派  
 生員李垣陳華遠黃虎斌監生劉紹芬鼓舞民壯登城守  
 禦廿三日卯時賊船蟻泊河口城上鎗礮齊發轟斃者不  
 計其數兵勇中有勇敢者縋城殺賊斬首截馘而回賊軍  
 奪氣當是時省城謀報不通惟附城鄉村募勇三千餘名  
 布列城外以備救援生員李垣又撥來鄉勇四十名城中  
 恃以無恐閏七月初十日都司黃曜吉自清遠撤兵回亨  
 惠留與守城而飛書入報大府十四日佛山西南兩夥賊  
 船共八九十隻駛至河邊用雲梯攻城又負土累石為礮



臺與城堞對峙我軍節節嚴防賊不能逞十七日賊復益眾來攻北門外聚賊至萬餘人曜吉見事急立將南門一千四百斤大礮移至北門甫發藥線轟斃者凡三百餘諸賊悉散去時賊中又有欲用火攻者聚棉胎稻艸於城邊適十八日大雨淋漓女牆盡濕賊計遂沮是役也自七月十四起至十九止斃賊二千有奇受傷者無算大抵曜吉之力居多又得大聖坊紳士陳驥梁聲揚龍泉梁駒李成舟陳鶴羣等暗將薪油財帛火藥礮彈從北門運入城中糗糧有備一切器用咸贍給焉采訪冊

二十四日副將崔大同遊擊洪大順率把總容騰龍等提兵往紫江村出城至牛欄岡遇賊同被害番禺志

是時城北賊李文茂與鴉湖賊甘先沙亭岡賊周春等聚

眾江村又到黃婆洞拜會豎旗誘脅益眾探報至崔大同等不整隊而出遂遇害賊由江村進營佛嶺市勢張甚總督葉名琛日上五層樓督戰番禺志

佛嶺市賊千餘人分聚三寶墟以陳顯良為首要截各鄉往來道路當賊初聚佛嶺市時不滿數千居民旦夕望官兵剿滅賊營亦夜驚言官軍至及賊黨日眾聚至萬餘洗村賊盧昌亦率黨相附近各村皆被擄掠番禺志

二十六日賊分三路撲省城東西北三門官兵擊退之番禺志賊分三路撲省城其在北路者圖奪城外礮台守臺兵以大礮轟斃之是時撫標五百餘名壯勇五百名先由東門出接戰適城內八旂兵及團練餘丁續至槍礮如雨東路賊敗退其西路賊斜趨西門之青龍橋草場汎外委黃賢

彪率汎兵百名及自募壯勇三百名截擊斃賊百餘餘賊

四竄采訪冊

秋七月初二日守備屈超羣千總熊應飛外委黎安瀾等在城北牛欄岡剿賊陣亡番禺志

賊踞牛欄岡距北門不及十里都司曾廷相守備陳國輝千總黃大榮及屈超羣等進剿直趨牛欄岡賊營賊發大礮抗拒屈超羣等領兵蛇伏前進破賊中營奪其大旂偽印忽有賊千餘從山背繞出撫標兵後短兵接戰右營右哨千總屈超羣左營左哨千總熊應飛左營左哨頭司外委黎安瀾及余清兆嚴正朝俱被害采訪冊

初八日逆首陳吉陷順德縣委員巡檢劉光裕等遇害采訪冊賊目黃鈞承林科舉梁安郭三登郭保仔等駛駕賊船數

百號圍縣城陳吉英振等復由陸路至眾推陳吉為首環攻三日城遂陷委員巡檢劉光裕都甯司巡檢沈昌運千總段世松余殿榮把總王昌華外委林全壽談海文李殿威皆遇害知縣馬映階逃去鄉民護之久之乃回省城賊在城中偽設部署焚掠鄉村所過悉遭荼毒采訪冊

初十日暴雨如注賊圍攻永康者定各礮台兵勇擊退之番禺志

城北賊二千餘人從三元里繞至飛鵝嶺圍攻永康者定各礮台守台兵以大礮轟斃大頭目一及賊黨百餘賊冒雨匍匐而進熊應榮領壯勇三百從旁擊之台上迭放大礮火箭賊退走陳國輝黃大榮又從三元里村前督兵截殺其迤東抄至東得勝者為衛佐邦擊退采訪冊

初十日九江賊李洪英攻香山小欖鄉陷之宋訪冊

九江會匪李洪英一名搭棚英攻小欖土匪盧靈飛一名靈碑黃庚

二朱鬼晚李大蕙社等潛約為變遂踞小欖脅士民裹紅

巾列營樹赤幟為拒守計是時龍山龍江賊破踞順德城

號東義股而欖賊與黃圃會匪黃福等號西義股連衡反

西北一帶皆附賊宋訪冊

十五日賊陳松年呂萃晉踞江門作亂圍新會縣城知縣陳

應聘會守備馮瑞林吳元陞舉人何瑄等悉力禦之宋訪冊

松年潮連岡頭人眇一目萃晉範羅岡人六寮更目素蓄

異謀互相煽結至是鄰屬順德鶴山相繼陷刑牲糾眾屯

狗山號召諸匪元陞率快蟹四艘勦賊猪頭山不克引還

初十日弁紳登陴防守四鄉賊響應黃協成起杜院黎與漢起都會陳協槐起

外海盧位起潮連施連福起裏村朱津起丹灶何倫正起白沙趙志盛起梟頭張鏞德陳萃確起禮樂伍從第起

麥岡李安起麻園梁世輔起東甲蘇淑成起岡背林祥起北洋黃連起張村李象能李德炎起七堡譚振綱起南坦

張龍李嗣想起河村陳尚起天湖朗黃植三起水背其餘不知姓名者不可悉數城內一日數十

驚男婦老穉出城逃亂者啼號震地應聘神色不撓專以

局務委成何瑄十五日黎明大雨松年萃晉麾眾趨東門

應聘親自督戰礮斃其執旗賊目追斬十餘級奪礮二雲

梯五賊艘由東河入者并擊走之賊連日復掘地道薰毒

烟百計環攻十八日夜大雷雨以風樓櫓盡濕賊乘間蠶

泊勢尤急自初更死戰至四更雨止賊始退人心稍定時

賊已據北街崖門兩礮台攻具甚備期在必得我軍大小

二十餘戰死亡相繼貧戶不給者羅及松苧草根木皮卉

藥所薰蛇鼠充食八月初六夜四鼓賊乘潮縱火船四大

艘直攻曲背城水閣礮聲震天龍彪定章舍命協拒逆鋒  
乃挫自是賊稱為堅城不敢復犯云新會續志

十七日賊何六陷增城縣采訪冊

西山從逆之蔡文莊蔡裕昌勾引賊何六糾黨數千於十  
四日樹旗西山村水東鄉勇攻之反為所敗賊遂連攻橋  
頭曹村等處叅將羅章棄城走賊遂以十七日陷縣城擄  
知縣倪森而去采訪冊

十八日官軍與城北賊戰於三元里後陣亡撫標兵七十餘  
人勇數十人

是日賊徒甚眾戰良久忽猛雨鎗礮不然遂失利采訪冊

二十四日增城賊焚劫白湖麥村棉湖等處武生尹瑞熊等  
遇害沿途慘掠所過一空采訪冊

時別隊賊首劉英才朱錦權亦糾黨由西福直抵小埔墟  
肆行剽劫高埔鄉紳率眾禦之賊始奔散後朱錦權擒獲

正法采訪冊

二十六日佛山賊陳開犯南海大瀝堡紳士歐陽泉麥佩金  
等率鄉勇擊退之采訪冊

陳開倡亂佛山欲與城北佛嶺市諸賊合大瀝梯雲扶南  
太平四堡適當其衝賊不能越五月中鄉紳舉人歐陽泉  
麥佩金生員何應春等首倡團練置礮械備糗糧為守禦  
計時鄉內賊有欲樹椿設間于萑塹海口者內閣中書何  
聘珍方為諸生與監生林賢基黎熒督勇擒殺二十八人  
而大範江夏荔莊登賢月窟諸鄉亦相繼勦除內賊至是  
佛山賊分兩路攻四堡一路入曹邊經龍頭墟窺草堂橋

十一約鄉勇發大礮斃賊十餘人賊偽道監生劉遇昌與其弟遇鴻率勇踰橋逐賊遇伏皆死後隊奮力再戰擒賊數人賊乃退一路由大鎮龔鍾邊良豪伯和破之四堡勇往援陣斬數賊賊敗走與草堂橋後隊同追賊至謝邊橫澗而回采訪冊

開平賊余兆表由順德龍山竄擾新甯茆茨嘴等處采訪冊

賊羅亞添攻陷九龍寨城采訪冊

二十七日夜聞河南有賊嘯聚候選同知林福盛率香山勇

千人及廣協兵往捕獲賊目三十餘餘黨解散番禺志

賊林大年陳金釭巢閩章練四虎等陷清遠縣采訪冊

時守備賴明貴先裹紅巾降賊武生記委歐大魁拒賊被執死之遊擊張德勝潛逃為賊所殺城守熊承才見事急

走匿山中被執不屈死紳民奉知縣程兆桂退守濱江鄭

燦生迎于其家知縣程兆桂在濱江密諭各屬紳士聯約

置軍械團練為克復縣城之計是月迴岐司沈堃亦遇賊

被害采訪冊

時縣城既陷逆賊練四虎屢攻龍塘紳士陳祥昌陳書元

等督鄉民前後十餘戰殺賊甚眾逆鋒為之少挫云采訪冊

閏七月初一日佛山賊傾巢攻大瀝四堡鄉紳士歐陽泉麥

佩金等復率鄉勇禦之賊皆敗走采訪冊

大瀝四堡團練既固人心益堅各紳士復斷扶南橋草堂

橋以防賊侵擾之路初一日賊十道來攻自辰至午不絕

眾號十萬先遣數千人攻仇邊藍翎千總仇國安與其弟

營千總仇鸞飛力戰死仇邊陷復有別隊賊由新橋渡攻

江夏者鄉勇與戰失利從九品劉澄清死之和尙能統坡山船由小朗渡直進瓜步橋登岸犯雷邊九潭等鄉陳開自率隊由水頭墟進搭浮橋以渡鄉勇潛伏不出賊分路競進日已西伏勇突起轟斃多人賊狂奔橋走擁擠壓溺死者無算餘眾遁田間者泥沒膝脛不能動鄉勇復聚而殲之賊羣向大鎮謝邊豐岡橫涪點頭基各路分走論者謂大瀝四堡九十六鄉首挫賊鋒足為省城保障而是役厥功尤偉云厥後大圃山南等鄉遇有寇警輒乞四堡鄉勇往援賊悉望風披靡

初四日官軍收復九龍寨城

采訪冊

知縣黃光周協同副將張玉堂都司譚蛟等率眾前進斬首三十餘級陣亡兵丁廖達邦林禹平二人即日收復寨

城

采訪冊

初六日賊分東北兩路至衛佐邦陳國輝林福盛等督兵勇擊退之

采訪冊

東路賊自燕塘出約二萬餘人分撲東關及竹絲岡痲瘋院衛佐邦營東較場擊之斬首二百餘級北路賊亦傾巢而出東自蕭岡西至瑤台相距十餘里屯聚無隙地義勇祠賊旗幟簇列數百里外之賊首皆于是日率眾來戰約十萬人連日東北路賊來攻皆擊退

番禺志

東莞賊黃廣興伏誅

采訪冊

廣興與吳溫矩等在東莞觀瀾墟滋擾為新安知縣黃光周所獲斃之又生獲劉洪四等二十六名就地正法

采訪冊

初八日賊鄒新茂等率眾犯龍門知縣喬應庚登陴守禦賊

廣州府志

卷八十二

前事畧八

七

不能入

采訪冊

縣西南之藍糞山疊巘層巒多以紙廠為業秋七月廠主  
鄒新茂新才新蘭高六駱矮張陳保等聯盟拜會閏七月  
初旬到永清地方豎旂招誘亡命旬日間聚至萬人初八  
日遂直撲城東門知縣喬應庚親至東門城樓督戰先後  
礮斃賊十餘名群賊膽喪一股由清溪竄往平陵一股由  
左潭竄回藍糞

采訪冊

十五日衛佐邦等攻城東燕塘賊營焚之斬獲甚眾陳顯良  
脫身走新造餘賊竄入牛欄岡

番禺志

時衛佐邦復先後督兵勇往簸箕村搜捕餘賊攻破瑤臺  
賊巢又攻勦東北諸鄉賊巢數處

采訪冊

賊攻香山港口礮臺踞之

采訪冊

閏七月初六日東西義賊合攻捕屬之太平沙鄉勇拒敵  
殺賊數十而眾寡不敵被戕數人賊燒燬民居數百家初  
九日攻香山司屬之第六沙居民奮力戰殺數賊十二日  
賊攻海口象角鄉勇新築土臺賊奪土臺樹紅旂於臺後  
之獅山西鄉紳士林德泉彭時清等聞變率練勇馳至殺  
賊數十生擒數賊拔其紅旂賊退屯觀音沙之西帆檣櫛  
比賊船頭目周秉寬雖應募而臯瀾海賊杜旺其假子也  
陰懷兩端且畏賊不肯出擊相持三晝夜十五日邱才穎  
與紳士往督戰中途望見帆檣已空而港口火起番匪梁  
湛聯等皆已應賊賊自羊蹄滘登北岸圍基

沙潭築石捍水者曰圍基

其內低級日二牙  
可以伏人不受礮列礮轟我自草塘牛脾滘入分流口登  
西臺後路縱火焚臺守勇殲焉賊復自灰爐滘渡太平滘

登東臺後路入礮臺殺陳星漢勇潰卽以礮反擊我舟師  
拖戰爭道奔北署守備歐炳釗被戕拖船頭目洗瓊開以  
前後船壅塞不能施礮亦敗歸邑人震恐惟才穎與紳士  
何贊清等坐局籌畫拒守不動是夜東鄉紳士林謙鄭藻  
如等督援勇星馳至連營于東門外楊大觀等議牽龍鳳  
船橫南六海載沙泥沉之暫堵賊進攻之路並加柵於龍  
鳳船外時賊據港口括場圍錢穀頓兵大饗待張溪內應  
舉火乃入上聞兩鄉人獲奸細蕭不知黃碧杜杏等賊知  
事泄不進采訪冊

十七日官軍收復香山港口礮臺采訪冊

官紳患賊據港口之不時擾我也亟謀所以擊走之十六  
日誓師於上聞整臺領隊胡元階歐勇郭碧城拖目洗瓊

開等皆聽命兩鄉紳士曾就顏等召員峯張溪之民鼓勵  
之黃安邦亦以長洲鄉勇至十七日朝食時東南風起因  
風縱火焚南港廬舍烟燄迷漫賊礮不能施洗瓊開奮前  
轟擊諸勇繼之遂大克之賊走還東北海我軍奪回礮臺  
獲大船九生擒梁林仔等賊師還駐上聞防溢口備應援  
十七日夜賊船百餘隻潛泊于涌口門窺伺劫掠適攬邊  
南朗下柵墟渡停泊海口礮擊之沉其船九斃賊三東  
鄉聞警赴援雲集賊乃竄還東西義巢穴采訪冊

賊鄺鰲峯踞香山小濠涌攻斗門土城采訪冊  
賊攻我西北東路皆不得志乃謀以八百餘船分道入寇  
是時黃福黑皮廣等奪潭洲港拖船據潭洲大嶼沙杜祐  
據橫檔擾東海陳五岡背村人據雞籠芙蓉等沙擾西海林譚



保據磨刀掛碇擾南海高老勝亦起於南鄺鰲等又起於黃梁都踞小濠涌其父結臬瀾劇賊杜旺豆皮盛等為外援攻斗門土城黃梁都巡檢翟文俊紳士趙夢梅等絡繹告急而上下聞之外水路梗塞購礮銃者皆由陸達於澳

澳夷亦戒嚴

采訪冊

二十二日開平賊譚亞受余兆表等掠新甯謝邊鄉知縣楊德懿督紳士率眾禦之賊多敗走

采訪冊

開平賊首譚亞受余兆表司徒貞吉梁亞壬等糾集新會開平佛山等處賊由茭荻嘴先後駛至謝邊鄉外登岸焚劫圖深入攻城知縣楊德懿派撥壯勇令紳士黃子元等管帶堵捕殺斃賊匪一百餘名時洞口橫塘大嶺水潮橫水各鄉紳士亦帶勇數千來援德懿即率記委黃兆麟陳

廷彪李鴻寶及紳士等督勇夾攻前後圍截自辰至午擊沉焚燒匪船三十餘隻轟斃賊匪一千餘名受傷落水淹斃無數記委黃兆麟陳廷彪又斃賊二百餘人生擒七名各鄉紳士先後擒獲十數名餘賊悉遁

采訪冊

二十三日賊掠香山濠涌上聞等處

采訪冊

二十三日二十四日賊大舉繫紅旗於南八西岸為疑兵攻西路之青薑竹仔林村攻南路之龍眼樹涌沙田金角環寮後曲涌村撲濠涌沿海焚掠濠涌整臺守船扼之不得逞是夜二百餘船分道寇小隱巷及黎村之東利涌二十五至二十七日再攻東利涌及下茄灰爐兩涌濱海村庄悉被焚劫鄉團大集援擊獲其探水賊郭進景賊始退先是官紳以東濠在上聞整臺後礮不能及且孤僻難守命

堵塞之至是賊自東移泊南六攻上閘偷挖東濠又自木  
驚逕登岸北門士民分兵禦之上閘整台守船轟沉數船  
賊始退復還東海攻張家邊四門濠頭村以小艇入各涌  
焚劫再挖東濠犁頭嘴水柵鄉民連戰鎗礮齊發賊乃遁  
走全隊再攻象角日夜礮聲震天我礮至五六發不能再  
燃賊番戰我幾殆適鄭允仕載三千斤大礮至獅山連擊  
中之賊乃逃再攻金角環寮後曲涌村泊寶鴨石撲下閘  
賊之攻下閘也恃大涌村有內應無後顧憂初象角大涌  
皆有土人接旗受賊偽職召給紅格於其鄉紳士不得逞  
又見官軍屢勝乃反正同仇賊不之覺二十六日大涌人  
伏礮於蕭家渡聞濠涌台船礮響乃自尾夾擊之濠涌鄉  
勇又移礮列於台東之松堤賊不及見礮發賊驚皆逃死

自是不敢復窺南路采訪冊

二十八日賊劉觀秀高六等陷龍門知縣喬應庚闔門死之

典史楊宣同日被害采訪冊

應庚知賊之必復來也捐貲募城內外及江夏堡水西堡  
壯丁入城守禦十七日平陵賊首洪亞先劉奇劉觀秀等  
率眾到城東江夏王賓劫掠藍糞賊首高六等亦率眾到  
左潭平天湖劫掠二股合數萬蠡擁趨城盤踞東廓墟恣  
意剽掠應庚率子弟家丁分段守禦晝夜巡視連礮斃賊  
數百名廿八日風雨寒甚勇丁少息奸民何亞華武生李  
正高陰為內應賊遂乘間緣梯登城應庚與其妻郭氏及  
女慶姑婢荷香典史楊宣俱死之義勇廖亞確陳亮陳勇  
環清樂廖亞彭亞輔譚柏鄭創成亞美培西壬癸紹良亞

輝亞晚山龍貴金與賊巷戰被殺時又有長甯別隊黑頭賊千餘與踞城賊不和即日下擾龍華被龍江繩武鄉團

礮斃數名賊始遁散

采訪冊

二十九日增城紳士陳維嶽等收復縣城

采訪冊

初城陷後紳士陳維嶽尹承先等退保欖溪與在籍縣丞陳勝扶諸生潘榕陳維祥等集村人千餘曉以大義誓與賊決死戰時何六引眾趨省垣留黨七八千與賊目葉阿胡等偽署縣事閏七月初四日陳維嶽尹承先及潘榕潘世魁武生姚鳳齡等督勇襲斬偽軍師僧明亮於證果墟并黨十餘人賊於是月傾巢出繞道突襲橋頭鄉我眾知賊謀設伏相待賊至大呼起張兩翼夾擊自辰至午賊敗斬百餘級生擒數十名獲旗幟器械無算連日敗賊於蔣

村廖村又敗之於賊西北兩門賊奔回西山村各勇乘勝

直搗賊巢賊不支分路四竄境內肅清

采訪冊

八月初五日新甯縣知縣楊德懿勦賊於牛山嘴鯉魚河面破之

采訪冊

賊復駕船六十餘隻由荻茨嘴駛入牛山嘴鯉魚山河面圖搶拔水閘深入攻城知縣楊德懿督率兵勇進勦殺斃賊匪三百餘名生擒二十二名其餘賊船竄逃獨崗白廟等處經武生黃廷玉等督勇攻擊斃賊百餘名餘駕船分竄長沙金山等處紳士余廷潤等生擒賊首余白女等五等十名均即就地正法

采訪冊

十四日新會圍解

采訪冊

知縣陳應聘在圍城中請師蠟書十三四上迄無要領幕友浙江諸生唐廷楨由間道往省飛報時在省紳士舉人英三俊副貢黃文玉監生譚敬何朝琅潘德芳呈請捐餉助救大府委守備黃彬羅福安以舟師由沿海口攻西壑千總黃顯帶東莞勇副貢生鄧林春以陸兵由汾水岡趣沙堤官兵無不一以當百各堡之樹紅旗者盡轉而白賊不支望風披靡城圍盡解采訪冊

十五日副將劉廷光率兵攻賊于小欖鄉我軍失利采訪冊

副將劉廷光率頭艚拖舫四十餘隻攻小欖時颶風甫息東南風大作十七日日當食中潮已落牽纜逆流西上賊先設礮臺於沙口迎拒而伏礮於欖面沙圍基潮落既盡兵船悉陷於淖賊蜂屯蝟集奪我頭艚船一斃水勇數十人貨裝盡失劉廷光奔回縣城采訪冊

十七日新會餘賊復聚于都會未幾聚于江門官兵均擊散之采訪冊

二十日順德賊關士彪等攻圍香山小黃圃一帶鄉勇力戰禦之乃退采訪冊

順德容奇鄉偽元帥關士彪楊甲楊成肥順何新偽先鋒關花面添寶珠九陳大廢率賊數千駕二十餘艘圍眉蕉大傘海攻劫小黃圃一帶鄉人奮力禦之礮斃數十賊遂潰圍村庄得不陷官紳以賊勢方集於北且圖南方以通一路二十七日署守備黃建勳帥師勦林譚保於孖洲海殺賊無算趙夢梅等告急再至采訪冊

官軍率練勇分路進攻花縣賊

時圖復縣城二十日武生張超龍在東路新橋戰歿同日  
伯生張鎮曾攻城亦戰歿東南兩路進攻之練勇陣亡十  
八名二十一日軍功八品游慶有在南路石下嶺排追擊  
逆首朱子儀與生員程士瀛監生呂誕登潘汝槐程廣豐  
林洪波林洪皋同戰歿東南兩路進攻之練勇陣亡二十  
七名二十二日東西兩路進攻之練勇陣亡十名二十三  
日東西兩路進攻之兵勇陣亡三名廿五日攻東埔賊巢  
練勇陣亡七名采訪冊

九月初一日香山紳士何信韜等攻破小濠涌賊巢土城圍  
解采訪冊

紳士何信韜等統水陸勇船四十淇澳司巡檢劉省三護  
其軍下黃梁都壓小濠涌轟礮擊其村鄺鰲峰遁村人縛

獻其妻子偽先鋒鄺德滿等遂解土城之圍采訪冊

初七日林福盛等焚牛欄岡賊巢番禺志

十二日進剿蕭岡龍潭觀賊巢篷廠六百餘座番禺志

各營分路進剿蕭岡龍潭觀賊巢千總黃大榮率潮勇越

嶺由山路攻入龍潭觀縱火蕭岡賊望見火焰亦驚擾衛

佐邦乘勢指揮把總戴朝佐率新會營兵勇衝入奪其礮

把總鍾朝信記委葉春華六品軍功鄧安邦率寶安東關

勇由左入賊皆潰散外委賴永清率安邑義勇合攻上山

焚篷寮林福盛會廷相陳國輝張金鑑分率各路兵勇沿

山襲殺龍潭觀蕭岡兩巢篷廠六百餘座皆焚燬采訪冊

新會賊攻外海外海賊陳協槐勾引而入大肆焚掠火數日

不滅死傷虜亡者百數十人采訪冊

十三日兵勇進攻佛嶺市賊營及義勇祠前賊壘番禺志

礮船由槎頭進口抄襲佛嶺市後兵勇先平義勇祠前濠

溝攻入賊壘奪獲大礮毀拆土臺並將篷廠焚燒道員沈

棣輝乘勝圍攻佛嶺市賊並焚其篷廠賊遁入石井自是

不復逼近城矣番禺志

十四日新會賊復犯江門官兵擊退之采訪冊

二十七日賊甘先陷從化縣知縣李福培典史趙應瑞闔家

死之采訪冊

先是七月中甘先等聚眾于錦崗時即擾及從化知縣李

福培率眾擊退之先後殲賊六百餘人至是賊用大礮轟

城從缺處擁入我軍眾寡不敵退入學宮尊經閣為賊火

所焚逃生者十不得一知縣李福培與弟李性培典史趙

應瑞及其家人等同遭火害采訪冊

冬十月初一日守備吳元陞等敗賊于鶴山瓦窰采訪冊

時呂萃晉竄踞外河陳松年結沙坪賊盤踞瓦窰將復煽

擾故有是役采訪冊

初二日署龍門縣知縣朱燮率同紳士李銓等收復縣城采訪冊

先是九月六日賊見各鄉團練聚集空城而逃時紳士李

銓謝廷顯梁廷輝廖重華李柱蘭皆在省稟請大吏委官

剿捕謝廷顯復出資募勇五百人沿途護送至是署縣朱

燮抵縣即擒逆首陳炳王蛟龍李將等正法并集附城紳

士梁應元陳安邦廖英華廖永華李欣榮等商酌善後事

宜分十八堡為東南北三局鐵岡上中馬鞍為西局各募

勇丁團練采訪冊

初五日賊攻香山全祿石井村庄鄉民施礮轟擊之獲賊船

一生擒數十人采訪冊

十一日新會東北局勇剿鶴山賊于瓦窰賊分黨來拒我勇

裹傷力攻生擒賊目一人餘眾遁遂擣其巢搜獲旂幟礮械

偽印多件瓦窰肅清棠下一帶始獲安堵新會續志

十五日盧昌率賊千餘人復屯三寶墟番禺志

十八日衛佐邦等率兵勇攻三寶墟斬偽元帥盧昌焚燒賊

巢餘賊逃散番禺志

官軍收復從化縣城采訪冊

十一月初一日開平譚亞受伏誅采訪冊

初二日賊陳開焚燬佛山民房采訪冊

賊因打單不遂逆賊勒索財帛謂之打單四路焚掠延燒民房以萬計

越三日火始熄采訪冊

初六日守備尹達章等擊破賊船于沈香沙溺斃者三百餘

人采訪冊

時北路賊既敗奪船欲窺泥城守備尹達章把總蘇海等

迎戰於橫沙江面賊大敗追至沈香沙而回采訪冊

官軍收復花縣采訪冊

初賊焚燬花峯其害甚慘於是紳士暗議團練通縣設立

六約互為聲援曰花峯約曰均和約曰一心約曰步雲約

曰聯平約曰獅峯約至是知縣張起鵬與紳士召募壯勇

一千名由炭步移營獅嶺并傳諭各鄉合力剿捕即日遂

收復縣城采訪冊

初七日官軍大破何六于石橋頭燬其巢采訪冊

賊何六據守石橋頭連營至梁邊白泥勘負隅數月是日

道員沈棣輝督兵船五十艘由五丫口至鋪前渡與賊接

戰礮聲如雷不絕隨營四堡勇先發大礮向賊巢轟擊繼

發火箭箱擲之賊徒震駭何六等棄巢潛遁連日剿平謝

邊橫濬各賊壘自是佛山門戶盡失賊勢始孤采訪冊

初十日新造賊船突至東圍署守備曾鵬高歐松茂被執至

新造不屈賊支解之外委朱耀宸等陣亡番禺志

先是陳顯良以其黨屈金陳四據新造而自率賊至三寶

墟燕塘以攻省城賊敗後遁回新造復糾招何六及波山

艇賊鯉魚仔何伯祥何博奮等船數十隻窺伺省河番禺志

十八日署龍門縣知縣朱燮遣紳士陳安邦等勦賊于土湖

我軍失利武生陳安邦增生梁應元監生廖英華等皆遇害

采訪冊

土湖積匪王志勝導引長甯沙田並寄居縣高明尚羅亞

廷等賊數千人到鐵岡左潭劫掠知縣朱燮派梁應元陳

安邦廖英華鄭紅輪帶勇千餘往土湖堵禦甫議紮營羣

賊蜂擁來攻安邦等數人均歿于陣時同被害者復有勇

丁廖裕廖孔賢陳丙超三人自是羣賊挾劫各村鄉出沒

無常不能盡紀采訪冊

十九日官軍勦擒官橋墟諸賊平之采訪冊

先是北路兵勇連攻破陳田江夏馬務諸賊巢餘賊尙分

屯于官橋墟大岡脚鄉石井墟三處十九日曾廷相等攻

破石井墟副都統來存等攻破大岡脚鄉衛佐邦乘勝搗



官橋墟賊巢皆焚北路肅清番禺志

二十日吳元陞等擊賊于新會白石敗績弁紳兵勇陣亡二

百八十三人采訪冊

水賊連犯北街礮臺均為官軍所扼陸賊結引鶴山沙坪

瓦窰餘股蹂躪白石十月効力武舉馮建辰往捕中伏死

五十三人至是該鄉人復說元陞陳可取狀遂于是日率

兵勇千餘過小河賊拒戰敗走我兵因貪掠賊所棄輜重

反為所乘新會續志

守備曾琪外委鍾光勦賊于黃埔長洲遇害陣亡馮吉宸等

兵勇數十人采訪冊

香山協右營守備曾琪統帶各船至車陂口新造賊船出

四沙橫海駕船抄截官軍之後賊蜂擁登船曾琪以火投

火藥櫃琪死賊亦死外委鍾光勦大礮擊沉賊船別有賊

船從後至遂中礮死賊船逼二沙尾礮台弁官以大礮擊

之賊始退番禺志

二十九日官軍收復佛山賊陳開棄營遁采訪冊

時官軍大勝賊漸攜貳署運司沈棣輝曰此機不可失也

遂率勇三千合舟師疾馳至臨海廟次日進兵棣輝親執

桴鼓麾眾直前遂復佛山賊復糾餘黨分十三路來撲官

兵亦分十三路應之賊復敗遂竄九江于是分兵克復官

窰小墟蘆包等處賊遂專向神頭矣采訪冊

賊黃槐花園攻增城良田等鄉紳士湯掄英率勇禦之斃賊

九十餘人采訪冊

十二月初三日把總黃鏞等勦賊于河南小港橋鎗斃逆首

林沈澂餘黨以次潰散采訪冊

新造賊糾合猛涌鍾村陳頭各賊由陸路犯河南把總黃鏞武舉黃龍韜由省城率兵過河禦之道員沈棣輝親往視師猛涌賊首林沈澂先至小港橋猝遇官軍前鋒數人鎗斃之斬其首翌日陳顯良率賊大至知林沈澂為兵勇所殺皆奪氣官軍扼小港橋擊之連日共擒賊二百餘賊退屯河南之新村上涌村番禺志

初四日新會縣陳應聘親駐江門犒軍賊水陸齊犯麾眾奮擊大破之采訪冊

自白石敗後人心洶洶岡州公局何瑄等以勁旅六百名添衛江門聲勢復振知縣陳應聘以兵勇連日苦戰親至江門犒賞辰刻至白沙聞礮聲疾馳往督戰兵勇聞官至

益效死力縣丞張景堂亦率街勇至狗山策應擒斬無算

賊大敗遁出境江門遂平采訪冊

賊朱子儀甘先等復攻陷花縣城采訪冊

十一日林福盛等由赤岡塔進攻新村上涌村賊巢焚之采訪冊

十三日官軍進搗西了賊巢破之采訪冊

十四日我軍至河南賊大潰陳顯良遁回新造河南肅清番禺志

二十日賊復寇香山南六張家邊等處兵勇擊退之采訪冊

賊於十八日寇東鄉水洲山礮臺截擊之二十日甲寅東西義賊船百餘自百花口至南六外委湛真偉湛逢亮以前山營兵赴援營于牛口山下賊焚大礮彈子飛越所過

大樹皆折枝會就顏等督勇目潘勝等於上開土臺分三段輪礮擊之護臺之拖戩亦轟礮夾擊賊敗走二十一日下東海分三路入張家邊村每路數百人冒死衝突鄉勇馬曰仁等奮擊敗之賊以小船渡藕塘濬承潮進水洲礮臺又擊之中其大艘鄉之農婦樵女荷戈守險署左營都司楊耀宗及城團紳士督援師馳至賊自橫門白花海分道去采訪冊

陳頭賊船犯大王濬口礮臺守臺兵走都司黃彬率巡船力戰却之采訪冊

自此每日一至皆為我兵擊退采訪冊

二十四日賊何六等復竄掠東莞石龍墟知縣華廷傑率眾禦之賊始遁散采訪冊

五年春正月初五日官軍攻破官窰賊巢采訪冊

時守備尹達章由文濬率舟師前進駐兵大圃千總黃大

榮督潮勇一千先攻破嶼地莊會四堡鄉勇分路繼進賊大敗走獲紅旗軍械無算采訪冊

十八日道員沈棣輝率舟師并沙菱紳勇攻陳頭猛涌賊巢焚之遣把總蘇海入賊水寨斃賊無數番禺志

十九日賊陷三水大塋圍監生李有光遇害采訪冊

時羣賊欲據西南以逼三水縣城恐大塋圍襲其後於四年九月遣隊劫西村十一月遣隊劫夏岡等村十二月遣隊攻同德圍皆敗回至是十八日糾眾數萬分六路來攻我軍亦分六路應之自辰至午獲賊目二人賊眾震懾翌日賊復傾巢出戰而潛從間道直搗我軍監生李有光遇

害民勇死者六十餘人采訪冊

二十日兵勇焚新造賊巢陳顯良聞風先遁番禺志

先是賊據新造釘橋頭礮臺是日亦收復沙灣菱塘紳士

於南村開局安集良善搜擒餘賊日獲數百人番禺志

龍門大雨雹采訪冊

二十一日逆賊復寇香山南六等處不克采訪冊

二十一日賊復合隊擊我南六賊分兵奪陸路自南六東

登岸張婆澳基邊城南練勇禦之自南六西登岸至鴨利

沙長洲城內練勇前山兵禦之墩臺守船巨礮齊發賊左

右不能自顧中其前隊及火藥大舟延燒莫救追至港口

外溺斬甚眾賊以二巨艦橫牛脾口縱火藥焚之我軍不

能進賊乃走還東西義自是不敢復窺上聞亦不敢復出

東西兩路矣痘皮盛見勢漸蹙欲乞降杜旺不從遂合黑

皮廣殺之杜旺餘黨又合而殺黑皮廣高老勝欲降於東

鄉不果遂遁去羽翼漸鍛生員何尙俸等擒賊黨何跛壽

數人馳報縣解省伏誅黃圃平西義賊日益孤采訪冊

二十一日鯉魚仔何伯祥等賊艘尙數十晝走獅子洋官兵

追至波羅擊敗之獲新會悍賊陳松年番禺志

二十四日兵船追賊至潭州敗之於是賊盡由順德竄肇慶

走廣西番禺志

賊馮驥觀擾虎門官軍擊擒之餘黨悉平采訪冊

馮驥觀等糾黨駕船在虎門村莊肆擾攻撲礮臺高州鎮

總兵慶寅帶閩省官兵馳往交椅環等處擊斃賊多名署

遊擊李鸞標派守備麥振邦等分路設伏斃賊一百四十

餘名追至濱沙適賊攻沙角礮臺正月十三十四日局紳

附生王垣監生王斗寅王元輔等督團勇堵勤王斗寅發鎗斃其渠帥王義歡陣歿官軍團勇合圍

攻斃賊三百餘名另賊船由猪頭山洋面向鞏固礮臺攻

撲慶寅督雲霄廳蕭日宣礮碎賊船七隻擒黃培基等七

名大角洋面有賊船駛至慶寅派李鸞標等帶師船分投

截擊並由龍穴追至橫門洋面千總劉興邦先躍過賊船

擒賊帥馮驥觀水師左營記委倪志祥復在零丁洋面擒

偽先鋒陳達賢聞廣官兵續擒偽軍師劉亞温並黨李亞

單等五名虎門一律平靖奏稿

賊甘先焚劫從化城南水口等處鄉勇力戰却之采訪

時闔邑設立六局團練專以除匪安良故雖逆賊乘間屢

次俱不能克采訪

二月初三日順德賊陳吉棄城遁采訪

時官軍屢獲勝仗吉自知勢孤潛約李文茂關鉅等千餘

賊來相助然終畏官軍勦滅是日盡運縣內倉穀空城而

逃采訪

初十日香山鄉勇收復小欖鄉采訪

小欖紳士某率鄉勇收復小欖鄉逆賊曾社吳萬剛鍾成

就反正初十日紳士集鄉眾於王中丞祠議轉白旗賊猶

負固紳士某怒拔劍起眾兵皆手刃大呼曰領旗來皆拔

紅旗豎白旗有賊行劫者獲之紳士某自斬以殉縛賊目

朱鬼晚等解縣銃斃之王長庚遁采訪

十六日三水圍解采訪把總黃鏞帶兵一千與舉人禰文懷歐陽錯等晝夜兼程

直抵城外李成舟龍泉徐彪等在省募勇二百先導陳驥  
梁駒梁汝衡等在省募勇三百接應內外攻賊不能抵禦  
於是賊圍盡解未幾羣賊復到掠蓬村新生等處均被鄉  
勇擊退采訪冊

花縣步雲局紳士率勇再復縣城采訪冊

九江賊李洪英復攻小欖鄉敗回采訪冊

洪英率船百餘由鶯哥汎順流下復攻小欖吳萬剛鍾成  
就實應之踞礮臺外委李雄剛拒戰練目李潮燃巨礮轟  
沉賊艘二斃賊無算賊退四月知縣邱才穎副將劉廷光  
率兵到小欖擒吳萬剛鍾成就置之法賊黨四百餘枷斃  
之賊悉平采訪冊

二十一日南海三水花縣局紳士合擊賊陳金缸逆黨數千

於花縣文岡村南海蔡邊村毘連地方殺賊多名花縣生員  
謝梓章戰歿并陣亡勇目謝潤芳並勇百數十人采訪冊

時賊陳金缸踞蘆苞蔓延至新村等處花縣土匪糾賊數  
千焚掠南浦鄉殆盡南海監生謝文耀花縣生員譚沛熙  
等與三水貢生謝大德以勇聯同各屬團練合剿之其陣  
亡人等大吏令於南海之白沙墟建祠祀焉采訪冊

二十八日賊復由蘆苞襲破官窰據之采訪冊  
二十九日新會荷塘蠅步渡頭突有紅旗賊船大小數百駛  
至蜂擁入村肆掠猝不及防劉容李三姓居邊隅者鷄犬一  
空次日復大至鄉勇力戰却之多所斬馘新會續志

三月初二日四堡鄉勇剿官窰賊戰于南門村軍功六品張  
瑞陣亡采訪冊

初六日官軍復進攻官窰賊巢平之采訪冊

十四日順德賊圍攻雞洲官兵及鄉勇擊退之采訪冊

十六日官軍進剿蘆苞生擒賊錢宣又獲其偽軍師朱豪采訪冊

春間撫標兵駐文滘兩月餘連剿南海花縣三水賊陳金

一缸一戰即北竄各鄉亦殲除內賊三水閩邑遂清采訪冊

十九日官軍收復順德縣采訪冊

清遠紳民奉知縣程兆桂克復縣城清遠志

花縣知縣張起鵬率兵勇剿除境內餘賊采訪冊

時選雲鼎大圃陸路勇各五百名另募北平水勇三百名

分駐炭步及附近之白泥等處節節嚴防與紳士籌辦剿

捕仍即前所立六約改名公局又別置河陽總局以紳士

統之於是聯保甲去奸徒地方賴以稍靖采訪冊

米大貴采訪冊

四月十一日新會東北局勇剿鶴山賊于沙坪賊悉竄逸獲

其偽叅謀呂某新會續志

先是甲寅六月沙坪劇賊馮坤倡亂鶴山知縣馬斌殉難

勢張甚江門賊目陳松年等倚為聲援迨東北開辦團練

賊仍四出糾黨撲犯江門至是署鶴山縣沈梁奉委之任

先駐新會謀于知縣陳應聘及岡州紳士請兵護行故有

是役新會續志

五月大雨香山黃梁都山崩流沙壅蔽隴畝采訪冊

秋七月初二日花縣知縣張起鵬剿賊于石墟破之采訪冊

逆賊江受帶率逆黨由湖南竄回花縣盤踞石角墟圖攻

縣城初二日張起鵬與各紳士督同大圍雲鼎各勇進剿李溪石角等處擒斬逆賊二十餘名賊始奔遁起鵬復移

駐橫潭剿辦李馨方朱子儀諸賊采訪冊

賊首甘先率賊數千復竄擾番禺慕德里司花縣石角墟等處官軍擒之伏誅采訪冊

時北路賊巢既焚李文茂竄廣西甘先竄湖南周春竄江西至是甘先由郴州敗回廣州府郭超凡番禺縣李福泰調集城北鄉勇會同花縣知縣張起鵬於蔗林捕獲甘先并其偽軍師曹文聲戮之采訪冊

冬十月署龍門縣知縣朱燮剿辦土湖研村等羣賊采訪冊

先是八月中土湖甘香研村土賊潛約長甯賊八百餘陸續屯聚地派墟眾至三千餘由岩前石蓮出左潭抄掠朱

燮飭四局紳士各選勇二百名並率所調茅岡林姓勇六

百名南平即沙逕八約勇三百名前往鷓鴣塔剿賊聞之分股

宵遁一股竄至麻地頭劉姓村民截殺數十賊擒解十三

賊一股竄至板橋遇新到長甯賊數百合擾上建上建勇

奮力迎擊陣斬數十賊賊乃走回長甯時各勇仍屯鷓鴣

朱燮欲乘便剿捕土湖賊會同把總余遠基帶兵各八十

名勒令土湖速交賊黨土湖人閉門抗拒朱燮乃命局勇

環攻土湖亦列礮相拒互有傷斃其耆老屢到行營乞哀

朱燮遂諭局紳撤勇與余遠基帶兵役回城先是王志勝

聞兵勇來剿私走藍漢山與賊首高六鍾亞學洪亞秀劉

已有低山人范亞興永興等商糾藍漢永清油田等處匪黨

六七百屯馬嶺欲趨土湖以賊少不敢遽動是日聞撤勇



卽偕高賊等率黨出高田直下土湖朱燮合局紳各帶勇  
百名添調上建勇二百名再往鷓鴣堵剿十月初四日王  
志勝與高六等人藍漢賊黨各散朱燮到土湖焚逆屋數  
間繳出礮械并到研村勦辦旋黃葉三姓拏獲賊首旋亞  
混誅之又下永清剿捕獲逆黨數十名就地正法采訪冊

六年春二月長甯賊首羅亞庭伏誅采訪冊  
龍門雨土采訪冊

三月新甯客賊起焚劫那扶等處采訪冊  
自咸豐初恩平等處土民與客民不和屢相仇殺官  
吏不敢過問至是新甯之客民亦思蠢動春夏間逆首武  
舉鍾大鏞生員鄭鎔黃騰芳傅騰輝武生余濟高等在邑  
屬西路那扶萬頃洋深井大門大潭大頂等處地方糾夥

立寨招集外賊焚殺而中路大龍灣河洲小旂山東路蠓  
蠅塘老村白石坑等處逆首武生鍾毓靈生員吳福祥葉  
香等應之南路曹冲之大隆洞那琴等處逆首楊梓釗生  
員陳志光等又應之三月十二日那扶萬頃洋客賊勾連  
恩開客賊焚劫那扶等處二十九鄉拒傷那扶營總司楊  
兆夢外委潘連標及兵丁十二名采訪冊

二十二日客賊焚劫白河黃馬等村拒殺兵勇二十餘人采訪冊

二十九日大雨東江水漲采訪冊

米大貴采訪冊

夏四月賊練四虎侯陳帶等糾黨萬餘由廣甯竄擾清遠三  
坑太平市等處采訪冊

時知縣程兆桂諭聯和同安兩約紳士堵禦後又諭咸泰合安聯安人和各約紳士帶勇札黃鷹座以防賊竄擾之

路采訪冊

五月初八日客賊攻陷海晏之大門深井富坑李坑東頭大江大嶺洞等百餘鄉采訪冊

十二日客賊環攻沙瀾洞各鄉鄉老陳良迪李洽衍率勇堵禦死之鄉勇死者一百四十六人采訪冊

二十四日客賊環攻海晏文村等鄉生員陳官衡監生陳鴻業率勇堵禦死之鄉勇死者百餘人連日又焚劫五十四九

墟斃監生黃業採鄺廣德等三百餘人采訪冊二十五日客賊又從撒水逕鷺斗逕麓鼓逕大嶺逕四路進迫海晏各鄉壯勇斃命者數百人采訪冊

六月西潦大至新甯續志

秋七月十三日連雨大風六榕寺花塔頂寶珠墮南海志

八月十八日賊練四虎侯陳帶等擾清遠逕口沿河等處都司黃大榮率鄉勇擊退之采訪冊

先是七月中守備湯麒照帶勇六百駐逕口山邊馮元亮帶勇一千二百駐迴瀾市二十四日麒照督兵勇過河攻

賊鄉勇皆隨至登蓋岡賊悉眾來圍麒照藝大礮拒之賊漸退散八月初二日都司黃大榮帶勇一千駐桂塘村麒

照移營大灣岡時各鄉勇以糧不繼漸散惟聯和同安兩約近賊故鄉勇堅守十八日賊悉銳過河大榮與鄉勇拒

戰破之采訪冊

二十一日署龍門縣知縣朱燮攻剿藍漢賊巢生擒首逆高

六鄒新蘭張陳保駱矮駱石秀等誅之采訪冊

初四月中搖斜賊徒糾合藍漢永清百餘夥突至鐵岡汎奪去未解之犯二名戕傷汎弁張元亮知縣朱燮方在永清聞信急折回縣城調上建茅岡南平勇各百名赴鐵岡剿辦時賊已聞風先逃盡竄往藍漢烏樹頭等處朱燮囑在省紳士李柱蘭代募潮勇三百名令大埔帶勇職員饒褒寅溯流而上七月十六日率同潮勇南平勇入藍漢山攻剿駐下禾倉搜拏賊匪七十餘名先鋒旗頭二十餘名八月二十一日連破五柵擒賊渠高六鄒新蘭張陳保駱矮駱石秀及黨數百就地正法并廟子角之五十餘賊悉行擒戮二十四日移營上中下三坪捕斬餘黨并飭烏泥禾倉等處舉約正設鄉局練壯勇編門牌而回采訪冊

二十七日土勇與客賊戰于大門鳳山斃賊數百名勇亦斃數十人收復大門大隆岡一帶采訪冊

九月英吉利領事巴下禮苦求進會城總督葉名琛却之夷船闖進珠江南海志

千總梁國定偵知英吉利划艇有內地水手十二人常在洋面行劫伺其艇進港徑往執之解赴讞局艇主蕭成亦內地人折落艇上夷旗激怒英酋懲患其索回逸犯總督葉名琛以未訊之賊九名與之英酋又盡索十二名復與之英酋又索獲賊之官葉名琛不許初九日英酋遂駛兵船入內河攻燬獵德礮臺翌日遞照會以折去艇旗為詞葉名琛復拒之十一日乃攻燬獵德對面礮臺采訪冊

英人攻燬中流砥柱礮臺又連燬龜岡鳳凰岡元壇廟火枝

各礮臺并據海珠礮臺運礮其上采訪

冬十月初一日英吉利焚擾靖海門參將凌芳死之采訪

時葉名琛兼署巡撫移居巡撫署中英人以礮攻新城壞

靖海城牆從牆缺入至總督署求見總督不得乃退出參

將凌芳禦之於一德社中鎗而亡采訪

英人屢請入城並請見總督不許自是以後英人連日發

礮攻城民居多損壞礮子及巡撫署者尤多采訪

初十日客賊復踞大門大隆崗一帶斃鄉勇一千六百餘人采訪

冊

十六日客賊分踰百峯山陷東海島土村員山頭立寨焚劫

坦塘南洋等處數十村斃監生李緝業壯勇七十餘人采訪

海賊攻香山疊石礮臺守臺勇轟礮拒擊勇丁余階平陣亡

鄉人出援賊乃退采訪

十一月初三日新甯鄉勇攻破蠓塘老村賊寨餘賊盡竄回

員山頭曹冲等處采訪

初四日賊練四虎陳金缸圍清遠縣城知縣程兆桂仰藥死

南韶鎮勒福率紳兵拒守禦之采訪

練四虎等久踞太平市勢漸窮蹙聞陳金缸聚黨在秤架

遣信求援初四日金缸遂出濱江與練賊合進至芋頭岡

知縣程兆桂聞報驚惶仰藥死委員鄭某典史胡某俱逃

初五日賊圍城燒上下廓舖時南韶鎮勒福來縣數日親

兵無幾人情洶洶紳士聯稟勒福具結堅守勒福即調紮

迴瀾市之守備湯麒照馮元亮二營兵勇入城調都司黃

大榮勇紮大巷口諭遊擊文通飭弁兵巡城又約鄉紳率

兵勇分段防守初七日聯和合安咸泰三約鄉勇破賊于  
教化嶺追至螺坑初八日黃昌瓊至咸泰請添勇未至賊  
大隊來攻眾寡不敵堡正張朝幹陣亡未幾知州薩保帶  
勇來縣并署縣事采訪冊

十二月十七日英人分撲太平門油欄門守城兵擊退之采訪冊

二十五日夷船退出大黃滘外番禺志

七年春正月十九日客賊王長貴汪海陡竄曹冲寨將滘南  
豐江東坑田頭等一百三十餘鄉焚劫殆盡男婦死者萬人

有奇采訪冊

花縣主事宋蔚謙剿賊于鶴田遇害采訪冊

清遠賊譚沙保劉亞咸等聚黨盤踞湯塘糾合侯陳帶由

滘埔擾亂占果關前一帶地方沿途焚殺黃壘秧坎埔共  
殺斃男婦百餘人賊遂出關前攻上岳鄉西嶺白圍村等  
處俱不能入時聯安約與高升約紳士隨滘江司曹興仁  
到花縣請知縣張起鵬發兵救援張起鵬調麥福源帶平  
洪勇主事宋蔚謙帶花縣勇密諭佛岡千總李發雄帶兵  
夾攻賊先為平雄勇所敗由四九墟遁走適遇宋蔚謙至  
督勇追賊賊繞出其後首尾不能相顧宋蔚謙及張起鵬  
之子并武生鍾鴻瀨監生王承猷俱在鶴田官路唇交界

地方遇害清遠志采訪冊

香山雨雹采訪冊

二月清遠圍解采訪冊

賊屢於城東隅暗掘地道用火藥轟塌城垣數丈賊蜂擁

而上幸城垣先設木柵賊不能進七年正月初一日賊暗渡河據洲心大巷口郭志融偕紳士數人赴省請援初八日援兵至敗賊于龍塘墟側十三日又協同鄉勇敗賊于洲心大巷口賊赴水死者甚眾二月珠岡司巡檢張清鑑督湘勇千餘人大敗賊于橫石賊走濱江城圍遂解采訪冊

獲藍漢賊首呂官錫誅之采訪冊

夏五月初十日洋人火輪船十餘艘入內河采訪冊

英人求助于法蘭西得大小戰船五十餘艘陸兵三四千人副將黃開廣統舟師與夷船戰于三山濠敗績拖船數十盡為所焚番禺志

法蘭西即佛狼機偶抵粵互市蠻貨無多且或間歲一至以戰鬪為國富強冠海外與英吉利接壤世為仇敵兩不

相下道光辛丑英吉利擾粵彼戈船亦從壁上觀逮癸卯議款後其夷酋來請謁總督祁墳初不許固請乃於荔支洲中傳見謂中國須練兵鑄礮大治戰艦方可禦侮且云願助戰時好事者或謂以蠻夷攻蠻夷亦中國之長策祁墳以撫議大定犒以緞疋牛酒茶葉婉辭謝之去至是忽連檣突至蓋已與英吉利連和而文移照會法國銜名乃先書其跋扈較英吉利尤甚云采訪冊

秋八月二十八日有一星大如斗飛至東方其色如火采訪冊

冬十月英人戰船數十艘入省河其陸兵分屯於河南采訪冊英人投遞照會有求地補餉入城三事總督亦以照會答之反復辨論不能決番禺志

二十九日英人小船數艘夷兵數十至菱塘司屬之市頭鄉

登岸為練勇殺斃十餘人英人旋糾大隊入鄉焚燬民居復為練勇擊退番禺志

十一月十三日香山協左營把總陳逢元在大東門外東山廟迎擊英人礮斃英人多名逢元中敵礮陣亡

十四日英吉利法蘭西陷廣州采訪冊

夷船駛入內河人心恒懼總督葉名琛惑於乩仙之說謂省城決無事故沿海內外俱不設備十三日夷船以火礮火箭攻省城大新街雙門底東猪欄增沙等處相繼起火其陸兵自東沙河登岸城內兵不出總督避入城內越華書院日暮洋人攻陷保釐礮臺竟夜礮子雨下翌日洋人從東北隅攀援入城番禺縣知縣李福泰妻自縊總督旋遷左副都統署會城既陷衙署公廨為夷兵所分據英吉

利領事巴下禮居將軍署兵目柯路輝及法蘭西領事馬

殿那居巡撫署居民避難外徙城市一空采訪冊

二十一日洋人挾總督葉名琛上觀音山遂出城登夷船去

巡捕官藍斌隨行采訪冊

長甯賊廖姓潘姓等千餘焚掠龍門高明鐵岡鄉民被戕者

數十人采訪冊

香山花縣荔支冬實采訪冊

八年春元旦雷鳴采訪冊

正月

詔以侍郎羅惇衍太常寺卿龍元偕給事中蘇廷魁督辦夷

務采訪冊

增城賊郭四友竄擾高禾唐鄉紳士湯掄英督勇禦之斃賊

八十餘人采訪冊

二月知府吳昌壽統兵剿平清遠板坑湯塘等處賊巢采訪冊

知府吳昌壽統兵由高田入魚嘴進攻板坑賊巢賊竄英

德官軍收復濱江剿平餘匪吳昌壽命前任知縣馬映階

紳士郭鍾熙劉士高等到湯塘會剿朱獻修徐東安帶聯

安勇隨行賊屯聚官田等處乘勝而前賊首譚沙保就擒

復由佛岡進剿賊竄觀音山後八月劉琦帶龍潭堡勇攻

西北宋官保帶神逕勇攻東北官兵攻其南賊無鬪志夜

賄劉士高營潛逃清遠志

三月大雨東江水漲采訪冊

夏四月二十二日夷酋率兵出城東北略地是時兵勇規復

省城皆營于東北決戰于嶼山麒麟岡斬夷酋夷兵奔入省

城不復出采訪冊

秋七月初三日英吉利闖進新安縣城鎗斃監生陳士楨暨

兵勇陳福生等三十五名知縣王壽仁禦之乃退采訪冊

龍門知縣明克峻調南平勇會同長甯從化兩知縣剿長甯

沙田諸賊十一月沙田平采訪冊

九月初七日連日客賊攻陷矮岡海亭大坑等鄉兵勇被斃

者三十餘人采訪冊

十二日英吉利法蘭西夷船擾香山全祿石井村西鄉義勇

赴援縣城兵繼之夷船乃退采訪冊

秋後省垣事定居民漸復采訪冊

九年春三月龍門雨雹采訪冊

秋七月十二日連日客賊攻陷梧洞蒲山牛山頭黃旗堂旗



尾山那開等鄉陳發捷率勇堵禦死之各勇死者二十餘人

采訪冊

十年春正月二十一日客賊攻陷豐樂屋間兩鄉

采訪冊

三月陳金缸誘江西花旗賊竄回清遠太平市焚殺村民七

月分竄德藍山高州信宜等處

采訪冊

香山竹有華

采訪冊

秋八月初四日新安土賊擾香山下茄灰爐兩涌蟹戶被掠

者五十餘家

采訪冊

十一年夏大雨江漲

南海志

秋九月英法夷兵退出省城

番禺志

冬十二月十三日客賊劫潯北上坑等堡三十餘村廣海寨

主簿王言千總黃應祥遇害

采訪冊

先是十年冬知縣曾惠均檄土客聯和未幾客賊暗踞赤

溪田頭鄉立寨至是復出擾潯北等村惠均遣言及應祥

前往彈壓被客賊戕害兵民死者三百餘人

采訪冊

同治元年秋七月朔颶風迅潮覆船壞屋無算溺死數萬人

番禺志

十二月客賊湯恩長竄踞大隆崗并攻陷西村等處

采訪冊

二年春正月初一日客賊攻陷臨田瀧門大洋榕樹仔一帶

斃男婦數百人初二初三日攻陷古隆南塘山背一帶數十

鄉初四日客酋湯恩長王丁龍攻破廣海寨城男婦死者四

萬餘人

采訪冊

二月按察使吳昌壽統兵圍廣海寨

采訪冊

夏四月新甯捷勝局勇收復鵝斗東壁東頭龍圖大江金坑

一帶采訪冊

五月初五日客賊陽擊甫草陰攻沙瀾洞旗尾山海棠復被焚劫采訪冊

新甯捷勝局與開平元勝局勇聯勦客逆收復大門深井新舊富坑一帶采訪冊

秋七月二十九日官軍收復廣海寨城客逆湯恩長吳福祥等竄回曹冲赤溪田頭等處采訪冊

冬十月新甯土勇攻破大湖山賊巢采訪冊

三年自正月至五月多雨采訪冊

夏五月初二日大雨連旬東江水漲溢采訪冊

六月客逆寇開平徑犯新會石步鄉知縣許寶珩率同岡州公局紳董何瑄等悉力防剿卻之新會續志

數年來客賊滋擾肇慶受禍最慘鄉局黯者多停罷守禦

希媒禍于新會瑄等堅不為動至是開平之宅梧股客勾

引新興股攻陷尖石恩平開平交界百里寂無礮聲賊遂

以六月初四日由開平古儒鄉走八十里劫羅村石頭龍

灣等處初六七日復掠鶴山屬麥村郭村泚山一帶民居

烽照水口水口離邑屬石步天等田邊各鄉僅隔一小港

賊初猖獗瑄等即請于寶珩策賊來蹤當無過大澤河村

西南兩路乞以一軍昇武舉何兆陞李其盛軍大澤分屯

要隘而令把總湯廷振萃精卒扼沙隄進援大澤退固邑

城其河村一路數十鄉丁壯不下萬人該鄉舉人關之翰

久辦鄉事足資捍衛部署甫定逮初八日賊果由水口直

犯邑界猛攻石步本營寶珩遂與瑄等約嚴備城守行間

軍火無暑刻缺緩而親臨布置之翰等分撥已定協同本  
汛外委李海安督鄉團悉力堵禦晝夜不懈賊致死尺土  
不得入其夜五鼓空壁遁新會續志

秋八月三水曹州有虎采訪冊

海寇劫香山荔支山鄉采訪冊

先是曹冲亂後其黨曾大鵝福袁亞興等逃匿黃梁都之  
大淋山結洋匪嘯聚其中與曹冲古兜犄角擄人勒贖濱  
海村如白蕉坭灣大浪環三灶乾霧小濠涌一帶橫行焚  
掠無虛日采訪冊

四年春正月總兵卓興安插客民未幾深井富坑大洞嶺背  
那扶大湖山等村又為賊踞采訪冊

二月二十四日客賊陷豐江殺擄男婦二千餘人采訪冊

三月客賊陷古邏坦塘等堡三十餘村殺斃男婦一千五  
百餘人並劫四九五十等處十餘村擄掠無算又破萌山塘  
堡殺土人百餘采訪冊

夏西江漲南海志

五月東莞颶風東莞志

五年春二月客賊破豐江殺擄千餘人采訪冊

三月饑南海志

二十五日夜三水滘江二鄉大雨平地水深一丈漂沒田廬  
甚多采訪冊

夏四月二十九日客賊破浮石鄉中禮鄉殺擄百餘人采訪冊

五月西潦大至瀕海諸鄉田隄多潰新會續志

秋九月初四日客賊破莘村殺擄三百餘人采訪冊

督糧道梅啟照叅將尙昌懋剿客賊于新甯駐兵南門前册

冬十一月官軍剿客賊于赤溪副將翁桂秋遇害傷斃勇兵

四百餘人采訪册

時總兵徐文秀周廷瑞李運榮分督湘軍進駐浮石南村

牛山等處水師提督任星元督兵船二百餘號環泊赤溪

田頭海面東路文秀率兵到赤溪相度地形山路險狹忽

伏賊四起官軍傷斃多人左營都督翁桂秋戰死采訪册

六年春正月二十二日官軍剿客賊于田頭副將王東林賀

國輝俱遇害傷斃勇兵五百餘人采訪册

二月巡撫蔣益澧剿客賊于曹冲駐軍浮石副將周廷瑞李

運榮駐軍冲金采訪册

十九日大雨雹南海志

夏四月十二日客賊乞就撫巡撫蔣益澧許之師還留各員

弁等安插餘黨采訪册

時議合土客聯和將所有田畝劃分疆界彼此互易東路

由分水凹起歷磅礪尾磅礪口慙西直抵海濱屬東界西

路田分水凹至尾厰猪母山冲金嘴直抵海濱屬西界北

歸土著南歸客民并奏請改設赤溪同知一員赤溪協副

將一員司獄一員以資彈壓采訪册

秋三水有蝗南海志

七年大有年南海志

冬十一月香山雨雪采訪册

八年春正月元旦子刻龍門嶺頭約有蛟龍穴地而起穴深

數丈二三里內皆有硫磺氣采訪冊

二十三日東莞颶風大雨雹采訪冊

二月初一日增城雨雹采訪冊

九年春二月三水龍池鄉有虎采訪冊

夏四月香山黃梁都地震采訪冊

秋七月官軍剿香山大淋山賊破之采訪冊

香山知縣徐寶符副將羅福安叅將鄭耀祥奉督撫札會

同新會新安營縣兵剿大淋賊十六日都司何熊飛擊賊

于馬角海內轟沉賊船二獲賊一追至大淋平塘等處獲

賊二奪賊船礮械無算二十一日鄭耀祥何熊飛回攻大

淋督兵分東西兩路登岸賊眾迎拒兵勇奮擊獲賊數十

餘泗水逃二十二日督勇登大淋島焚其草舍采訪冊

九月十七日九江墟火自辰至未燒民舖八百餘間南海志

三十日香山三灶海賊聚深井後山高巖都司何飛熊會同

新會營兵守備黃祥率兵勇捕之獲麾旗賊首一賊敗走追

至望天臺山賊伏礮叢樹間斃外委馬龍安及兵曾亮升數

人後隊兵進夾擊破其巢出被擄男婦十六人幼孩二人餘

賊多遁采訪冊

十年竹有華采訪冊

十二年夏四月有龍氣起于南海五丫口過洲表村壞蟹戶

房屋數十家采訪冊

六月十三夜有流星光芒照地墜于西南其聲如雷采訪冊

十三年秋八月十二日颶風并潮大作壞房屋船筏無算采訪冊

風從海上起頃刻潮高二丈濁若泥滓澳門壞船千餘溺死萬人檢得尸者七千香港死者數千緝私船亦壞自叅將以下武弁死者十餘人香山順德圍破塘決沿海民被淹受傷最重東莞新會新安次之南海番禺又次之風由東南上西北至肇慶止采訪冊

南海譚宗浚分纂 南海梁 起初校 順德盧乃潼再校

番禺史悠履三校 順德羅 槩四校

廣州府志卷八十二終

廣州府志卷八十三

古蹟畧一 城址

南海縣

府城卽番禺故城通歷周夷王八年楚子熊渠伐揚越自是南海事楚有楚亭亦作庭舊圖經廣州城始築自越人公師隅號曰南武吳越春秋闔廬子孫避越嶺外築西武城後楚滅越越王子孫避人始興令師隅修吳故南武城是也秦以任囂爲南海尉初居瀧口西岸俗名萬人城旣乃入治番山隅因楚亭之舊俗謂之任囂城又相傳南海人高固爲楚威王相時有五羊銜穀穗於楚亭舊說有五仙人乘五色羊執六穗而至今呼爲五羊城是也見續南越志 遂增築南武城周十里及趙佗代囂益廣囂所築城今謂之趙佗城漢平南越改築番禺縣於郡南六十里爲南

海郡治今龍灣石壩之間也號趙佗城亦曰越城後漢建安十五年步騭為交州刺史廓番山之北為番禺城後又遷州治於此自是不改城塚記郡南城步騭遷州時規制尙隘唐廣明間為黃巢所焚天祐間劉隱更築鑿平禺山以益之宋慶厯四年經畧使魏瓘增築子城周五里皇祐四年儂智高寇廣州不能下命瓘再知廣州瓘復環城浚池築東西南三門甕城熙甯三年經畧使呂居簡議修東城未果轉運使王靖城之表四里合於子城明年經畧使程師孟築西城周十三里紹興二十二年經畧使方滋修中城及東西二城以禦寇嘉定二年經畧使陳峴以南城闌闌稠密無所捍蔽乃增築兩翅以衛民居東長九十丈西五十丈又謂之雁翅城紹定六年經畧使方大琮增修端平二年開慶元年皆嘗葺治

景炎三年蒙古攻廣州州將張鎮孫以城降明年蒙古毀天下城隍此獨無恙洪武三年因舊壘修葺十三年永嘉侯朱亮祖等以舊城低隘乃改築府城連三城為一東北包越王臺山北連馬鞍至於白雲之麓岡阜相連不斷又建五層樓於北城上高八丈名鎮海樓稱為雄勝

據方輿紀要

謹案南海志云舊志別出南武城越王無疆初敗避居東武公師隅於南海依山築城以擬之名南武後趙佗都之自稱南武王竊謂其說非也史記南越尉佗列傳秦已破滅佗即擊并桂林象郡自立為南越武王高后時禁南越關市鐵器於是佗乃自尊號為南越武帝韋昭曰生以武為號不稽於古也據此則武非地名審矣漢書自尊號為南武帝殆傳刻脫誤

韓昌黎詩樂奏武王臺亦不謂南武王也黃通志事紀乃謂佗改南海為南武自立為南武王又自稱為南武帝皆襲譌本漢書之誤而各志又沿其謬矣漢書高帝紀詔曰南武侯織亦粵之世也立以為南海王續漢書志注南武侯織居交阯郡之羸陟今其地不可攷然詔言南武又言南海則又非改南海為南武可知蓋南武城即趙佗城或當時稱為南越武王城後人省為南武城舊志謂築自公師隅必不然矣方輿紀要引吳越春秋闔廬子孫避人始與公師隅修吳故南武城今吳越春秋無此文鄉壁虛造不足為據故刪而不錄并訂其誤於此阮通志謂伐揚越事見史記楚世家文云熊渠興兵伐庸揚越至於鄂

索隱曰有本作揚雲據此則揚雲當在今房鄧之間乃江上楚蠻地未必在粵東也通歷馬唐馬總所著世無足本不可考矣圖經所云公師隅事越絕書及他書亦無佐證疑以傳疑究莫能明也

子城慶歷四年魏瓘初知廣州忽雨頽城角得古甃甃面範四大字云委於鬼工蓋合而成魏也乃大築子城周五里未幾儂智高寇廣州城堅完民逃於中獲生者甚衆朝廷以瓘有功除集賢院學士再知廣州復環城浚池築東西南甕城門三南曰鎮安西曰朝天東南曰步雲東曰行春則接東城後方大琮改朝天為有年步雲為沖霄

據輿地紀勝南海百咏黃通志方輿紀要

西城程師孟經始於熙甯四年周十三里為門七東南曰航



海南曰朝宗曰善利曰阜財西曰金肅曰和豐北曰就日後方大琮改就曰朝天

據南海百咏黃通志參修

謹案南海志云元以前以子城與東西二城為三明洪武中連三城為一於是舊址皆湮然考南海百咏藥洲在子城之西址南海古蹟記五仙觀在子城內又云子城東有安期生蒲礪溪黃通志云清水濠在行春門穴城而達諸海又云南海舊縣一在子城內元遷建元混一方輿勝覽云番山在南海縣南百咏引圖經謂番山在府學後據此則子城西不盡九曜坊西南不盡大市街東不盡廣府學學少東與今清水濠直東北不盡小北門其地半屬本邑至若東城則盡番禺地也此與上條皆屬府城以其為南海界故別出之

趙佗故城在縣西二十七里即尉佗都城也

據元和郡縣志

陸賈故城在縣西一十四里賈之來也佗不即前賈故為城

以待之

同上

咸甯廢縣

南漢置

在南海縣西

據

大清一統志阮通志參修

謹案阮通志云太平寰宇記南漢析南海為常康咸甯二縣蓋劉龔嘗言家本咸秦恥為蠻長郭志謂南漢析置常康咸甯以擬長安是已

番禺縣

東城宋熙甯三年經畧使呂居簡議修未果轉運使王靖城之表四里合於子城

據方輿紀要

謹案此即府城以番禺界別出之

任囂城在縣東二百步宋時為鹽倉後併入東城

據黃通志

盧循故城在縣南六里狀如方壺番禺志云在郡南十里與廣州隔江相對俗呼河南又呼水南今故堞隱然南漢時以為倉廩人呼為劉王廩循子孫留居之為盧亭蠶戶據元和郡縣志

輿地紀勝南海百咏黃通志參修

番禺廢縣秦舊縣故城在今縣西南二里縣有番禺二山因以為名或言置在番山之隅開皇十年改置南海縣即今縣是也長安三年於江南洲上別置番禺縣其洲周迴約八十里宋開寶元至治中始徙治城內據元和郡縣志方輿紀要參修

懷化廢縣晉置在縣東南據大清一統志阮通志參修

謹案水經浪水注浪水東逕懷化縣入海即此方輿

紀要云在府東北誤也

熙安廢縣劉宋置在縣東南同上

順德縣

石甕城金斗城並在伏波橋西南五里據順德志

謹案張府志漢元狩間遣路博德楊僕擊南越呂嘉於橋西南五里築石甕金斗二城僕攻敗越人縱火燒城城中皆降越人呼甕為涌城即故地此殆誤以僕焚都城事混於博德以度橋攻二城事順德舊志亦沿其謬不知二城僅彈丸漢兵將至即棄而逃亡無拒守火攻事史記漢書南越傳可覆案也至謂元狩間擊南越元狩自是元鼎之譌亦不可以不辨

龍潭城在縣西五十里元末土酋盧實善據此與何真角立築土城以自固延袤千有餘丈明正統末黃蕭養復據此亦名千人聚據大清一統志

謹案張府志云在北水龍潭村

東莞縣

東莞故城在大萌村東據黃通志

謹案黃通志云東莞縣故基凡二一在大萌村東一在東莞塲北並列於東莞縣張府志同阮通志以東莞塲北之故城即今新安縣治改列於新安縣今從之

寶安廢縣晉置在縣南二百五十里據方輿紀要阮通志參修

從化縣

從化舊城在橫潭村今屬獅嶺巡檢分治其城隍廟儒學地屋及故城址猶存據張府志

增城縣

增城故城崑崙山上有聞風增城因增江為名在縣東北五十里唐末移於今縣東北十里九岡村今為民居名東街據元和郡縣志太平寰宇記大清一統志張府志參修

謹案黃通志云增城故城一在開元鄉金牛都一在

九岡村

綏甯廢縣劉宋置在縣西南四十里今為綏甯鄉據阮通志增城志參修

新會縣

廢岡州隋置廣州記四會有金岡新會即岡州在側因江為州名也據輿地紀勝張府志參修

謹案張府志云隋岡州治今不可考或曰在縣北黃

雲寺前唐貞觀十三年廢

盆允故城劉宋置在縣北二十里據大清一統志阮通志新會志參修

謹案方輿紀要云在縣東

新夷廢縣吳曰平夷在縣西四十五里據方輿紀要

宋元廢縣劉宋在縣東北同

封樂廢縣劉宋在縣西北據大清一統志阮通志參修

義甯廢縣劉宋在縣西南三十里天臺村宋開寶四年裁義

甯併入新會今為民居猶有南門巷衙前倉邊橫街等鄉名

據黃通志阮通志參修

謹案張府志云在縣治東阮通志云義甯宋徙治東

溪今為開平縣地

### 香山縣

香山故城在城南宋紹興二十三年以香山鎮置縣元末縣

尹孕羅歹移縣治古寨山洪武初遷復二十六年置香山守

禦千戶所改築故址為軍營據黃通志

香山故鎮即宋金斗鹽場在縣南一百五十里地名濠潭舊

為金斗鎮屬東莞紹興間改為香山場後遷于前村址廢據黃通志方輿紀要參修

通志方輿紀要參修

謹案張府志云在縣東南元豐九域志以金斗場屬

新會其說互異

香山砦在縣北大欖村明洪武二年改置巡司據方輿紀要

### 三水縣

三水鎮在縣南昆都山宋置戍于此屬高要縣明嘉靖五年

割南海三都高要十都置縣於白塔村之龍鳳岡取古三水

鎮為名據元豐九域志大清一統志郝通志三水志參修

### 新甯縣

文村古城

國朝初舉人陳王道倡建以禦王興後王興據之兵敗闔室自焚城凡四門知縣王嵩名其東曰東陽西曰西康南曰南薰北曰北拱據新甯志

清遠縣

尉佗萬人城在漢中宿縣北隕山據黃通志

謹案張府志云尉佗萬人城在清遠峽漢中宿北隅故址尙存與黃通志合考尉佗萬人城有二一在清遠一在英德阮通志分列之本無可疑清遠志稿援元和郡縣志英德縣北四十里之尉佗萬人城以牽合於清遠其實非也

五婆城在縣東北橫石司側相傳有五節婦共築故名今其

遺址尙存據大清一統志張府志清遠志參修

謹案阮通志云五婆城凡二見一在清遠一在英德彈子磯考輿地紀勝武婆城在興甯縣西二里當五代擾攘武婆糾合村落屯堡自衛疑五婆乃武婆之誤後人展轉傳會也

古城基在社稷壇前居民藉此爲衛據張府志

中宿舊城在今城東北基址尙存同上

中宿廢縣漢置在縣西北六十里池水鄉一云在政賓鄉有政賓江據大清一統志阮通志清遠志參修

謹案阮通志云寰宇記中宿峽在清遠縣東三十五里縣以此得名又黃通志方輿紀要並云隋改中宿爲政賓縣移東官郡治焉無明文可證考隋書地理

志南海郡政賓舊置東官郡平陳郡廢則隋無東官

郡矣陳以政賓屬東官而當時仍有中宿縣又元和

郡縣志云梁武帝置清遠郡中宿屬之則中宿自屬

清遠郡政賓自屬東官郡蓋以一縣分而為二又分

屬兩郡亦不得云改中宿為政賓移置東官郡也

威正廢縣

陳梁時置

在縣西北西南有威鎮山故縣在其側

據大清

一統志阮通志清遠志參修

故清遠郡即縣後衙北址

據張府志

新安縣

東莞故城在新安縣東九域志宋書州郡志東官郡故司鹽

都尉晉咸和六年置元和志本漢博羅縣地隋開皇十年郡

廢屬廣州唐至德二載改曰東莞取舊名也九域志開寶五

年省入增城六年復置有東莞鹽場蓋改置縣於北境而以

故址置場明洪武中復分東莞置東莞守禦千戶所築城在

縣南之十都海濱一名南頭城舊東莞志東莞故郡即東莞

場又有故縣在場之北城子岡坡勢如城即今東莞千戶所

萬歷元年始於東莞所置縣曰新安縣志城子岡在今縣東

清一統志參修

據太平寰宇記大

謹案阮通志云黃志東莞故城一在東莞場北郭志

寶安縣唐至德二年更名東莞徙治到涌即今治洪

武初於城子岡舊治置守禦千戶所萬歷元年改為

新安縣據此則黃志東莞場北故縣即今新安縣治

郝志仍繫東莞誤黃志又云東莞故城在東莞縣大

萌村不知何以有二也豈一為縣一為郡耶司鹽都尉宋書州郡志作司監都尉寰宇記作司鹽都尉後人因東莞有鹽塲遂謂當作司鹽然州郡志云司監都尉治若為鹽官不得云治也考百官公卿表監御史秦官掌監郡又曰郡尉秦官景帝中二年更名都尉後漢書每屬國置都尉一人本注曰凡郡國皆掌治民進賢勸功決訟檢姦都尉之職如此不聞治鹺政也蓋吳承漢制稍變其名為司監都尉耳

屯田鎮舊志大寶元年春於寶安縣置屯田鎮即此

據張府志

花縣  
從化故城在縣西南明宏治二年置從化縣康熙二十二年巡撫李士楨疏言番禺南海三水清遠英德從化等縣錯壤

之所有花山去府不滿百里為官民孔道須設縣治二十四年給事中王又旦又疏之

詔可取花字為名云

據大清一統志

番禺金錫齡分纂	番禺史悠履初校	番禺金佑基再校
	番禺周熾皋三校	番禺史悠晉四校

廣州府志卷八十三終

廣州府志卷八十四

古蹟畧二 署宅一

南海縣

謹案阮通志署宅不分南海番禺與城址兩縣分屬之例互異茲載省垣署宅仍分屬兩縣以昭畫一其地在兩縣之間者則歸南海而番禺從畧焉

秦南海尉署始於任囂居瀧口西岸萬人城趙佗徙近南海郡去今省城西二十有七里既乃入治番山之隅因周末楚庭之舊其署在東二百步宋為鹽倉據黃通志

謹案秦瀧口之西岸漢南海郡之在省城西者俱屬南海周楚庭之東則屬番禺是此署創建之地與後徙之地不同姑仍黃通志之舊連而及之特發其凡



於此

隋廣州總管府開皇九年平陳開總管府以統嶺海兵馬別置公署於刺史之西明為指揮都司署案今布政司署古之廣州刺史署也其總管府在刺史之西今巡撫署疑即其地

據黃通志阮通志參修

唐嶺南道節度使其府治即舊刺史署居之號曰都府有府

二曰綏南番禺又有經畧軍屯門鎮兵故軍府以廣為盛其

副使司馬判官支使功曹書記參謀隨軍皆列署於內別有巡察按察巡撫等使皆列署於外然不時至至則汛掃總管

之府居案唐之嶺南節度使宋之經畧安撫使及清海軍大都

督府元之宣慰使司都元帥府明初之行中書省並即今布

政使署同上

宋經畧安撫使司即唐節度使署皇祐四年始詔知廣州軍

州事兼兵馬鈐轄帶經畧安撫使名為廣帥改南漢雙關為

雙門先是劉隱鑿平番禺二山之交疊石建雙關扁清海大都督府元符二年經

畧使柯述別建經畧安撫廳於其西其屬通判司理參軍司

內機宜文字皆列署於內據黃通志

宋王積中記紹興四年夏六月朝請大夫柯公以祕閣經畧

於南海公溫陵人常通守臨漳帥福唐按曹湖湘之間聲名溢

愛而親不令而孚谿谷島嶼上下民物翕然太和公至視事

舉一二便民之政民益感化而幾無可為者觀府門隘庫偏

處東隅官寺民居交隘必側與轉轡乃克有適公顧而嘆曰

田夫起茅舍必立表測景以求其端斬荆棘以為戶必引繩

面勢以求其正故昔之建國立為民極者必以辨方正位為

先南海部州十有五統縣四生齒數十萬番酋雜居寶貨

通會五嶺之間無與比大而迺元戎之宅卑陋若此甚非所

以昭天子節制慰安遠人至意且今國家累聖樂育萬國陶

化小邦下邑美才錯出而赫赫南海寂寥未聞豈方未辨位

未正山川之氣猶蘊而然與惟譙門之舊適臨通衢而宜詔

堂適對其衝迺崇譙門而新之迺易宣詔堂而大之上起層

樓以壯麗譙中為複門以列棨戟復為黃堂以饗軍旅又取

劉氏鐵柱于荒草汗泥間牽曳置立堂下由是出焉洞重局

逾譙門以抵城闈以臨漲海其袤三里其徑如矢始於秋  
 八月成于元符二年春二月己卯於是飛觀大厦巍峩相望  
 登降燁煌翠楹騰光州人士女鼓舞來會殖殖翼翼若掃閉  
 則百物生自茲始矣公迺圖其狀而書之曰公語治民之要必  
 於積中積中從公之遊實有年矣每見公語治民之要必  
 容而誦曰聖人感人心而天下和平故聞公之治民而弗傷  
 也嘗讀五代史見劉氏嗜殘酷至于炮烙刻剔有不忍言者  
 而其自奉乃有玉堂劉氏嗜殘酷至于炮烙刻剔有不忍言者  
 可勝慨哉今天下久蒙德治天子命帥又得仁厚如公者宜  
 益樂從其所興之役也蓋自開寶四年潘公美縛銀以致闕  
 謂玉堂球殿之跡皆成灰燼而石門而鐵柱持以不朽者迺  
 為今日帥臣構堂之用使曠俗異類觀德而向化然則南海  
 記清海軍門始葺於紹興丙子折公彥質也改作於淳祐甲  
 辰方公大琮也南州土雜砂木無雪霜板幹不力斷削尤疏  
 城壁廬舍不久輒墮公審其然築基廣十丈四尺深四丈四  
 尺高二丈三尺虛其東西二間為雙門而樓其上者七間凡  
 基皆登以石覆以木兩旁地為翅環以翅樓前為頌春宣詔  
 二亭用木以株計者千五百以條計者五萬瓦釘各十萬  
 灰萬石工六萬三千糜錢二萬若干縉明年某月告成公大

饗參佐賓客將吏其上饒吹轟空牛酒系道觀者數萬皆曰  
 輪奐美哉公以予嘗護曹而攝閭也乃授簡使著書之按作  
 南門筆於經立泉門詠於詩重其事也余行天下州無小必  
 致美其譙巍巍統府舊譙庫甚弗稱威重岌焉將壓尚莫顧  
 省誘日州貧無浪費也民勞勿重困也公既繕三城新屯樓  
 八十三所城西隅有亭曰南海勝觀公又亭於東隅曰番禺  
 都會而門之役最鉅視福泉安加壯麗焉然福資浮屠  
 建求科降泉仰賈船惟公自用節縮餘力不以斬人南兵習  
 勤苦技藝公拊而用之畚者臂者斤者坊者皆兵也不以煩  
 民公可謂仁且智矣自唐至本朝廣州用歲闕數萬緡故前  
 寢者或淹奪商賈或沒入豪右或遣軍吏貿易以規贏然軍  
 此卒不能富而霸政時出民人之懼者衆矣公純乎儒術前  
 數年亦不一試所入租賦而已期年積鏹十萬緡明年如之  
 明年亦如之為備安三庫稍出其錢與民通子本錢如之  
 六釐別儲之以備他費荒陋改觀緩急有備過前十數公  
 能使枵然大州化為殷實荒陋改觀緩急有備過前十數公  
 遠甚豈有法可傳哉公謝曰此陛下仁聖朝廷威德也吾何  
 功之有直幸焉耳蓋州貧非一端其大者曰調發曰迎送曰  
 糴運之費曰契錢之法自吾至四封無警或小警即定一也  
 他人亟遷數易而吾四期不得代二也子謂吾有他謬巧乎  
 吾聞昔之稱南伯者必以清德宋廣平其首也孔殘鄭權抑  
 其次焉公過於苦淡服用質素貴為方伯一室蕭然夫清則  
 費簡儉則財聚曰清儉者公之實踐曰幸者公之謙志也至

於妙選而久任之陛下真仁聖哉公蒲田人端平名諫臣嘗  
立柱下掌內史書今待制寶謨知廣州廣東經畧安撫使於  
是績狀顯著天  
子將趣公歸矣

宋轉運使司署在航海門內仙湖街開寶六年廣南平其後

置轉運使嘉祐中始定置司署改偽漢南宮為之案此即今

九曜坊之督學署據黃通志阮通志參修

元廣東道宣慰使司都元帥府至元十六年因宋舊署改建

其公廳曰帥正堂其常衙廳曰威惠堂其佐同知宣慰使司

使命都元帥皆列署於內其前為經歷司皆列署於內泰定二年都元帥

忻都重建據黃通志

元程準記天子嗣大歷服申飭憲度率祖攸行岳牧欽承際

天所覆惟粵南負山瀕海東閩西桂藩屏夷夏當諸番朝貢

軍賓之衝實南交一大會府初政以宣撫列郡行樞密院以

調兵符刑德異尚齊一罔功迺收樞柄益使以帥名開都元

帥府銀章金菟建宮東僚甲穀耕屯刑禮之策二十八人宣威

馳奏者如之通事知印各一人譯史二人幕府典籍者倍之

帥壇闕鐵議幕吏舍帳闈戈戟兩階隆棟霓連千楹如貫三

帥坐堂上佐二寅協吏左右雁鷺行肅以進士罷虎先後櫟

鞞專職分而材聚蓋將尊瞻視張國威攝裔夷柔遠人耳又

豈直苟美邪自職方籍貢距今五十年因仍簡陋賜履南海

者豈無一日必葺之思軍興調度輒分其暇材力工費有司

擅度少使民非其上則執法者已闖其後故任曠厥居毋敢

以安遠一再補治今元帥忻都公趾美拜後百廢咸舉於

衆曰天子命我幢牙葺廬費歲糜承宣指授之所敢視之

猶傳舍乎捐俸率先佐貳賓僚下逮胥吏喜聞恐後合官幣

積餘三百萬市材僦傭梓殿陶琢獻技攻工受直恐負外堂

內寢棟宇增煥遠譙近節樓觀凌霄路門鼎開無署軒跋籌

思之堂出內掌故之室兵廬武庫雙圍騎坊星棋環布完舊

益新材裕人和吏處功倍經始泰定乙丑浹旬竣事壞久而

成速宜有述以垂後竊嘗觀公之治粵以廉為本以靜為勝

致海波清地虺藏瘴霧息足食足兵而民自信以正帥正而

盜自止人不能之而公能之固古方伯連帥之所難也若夫

羅太倉以備歉歲清資選而拔寒滯雪沈寃于無告之餘回  
天憲於淫威之手則又數千年遐方遠臣之所未有公真廉  
而能也若不取不子小廉曲謹自潔其身無補于民生休戚  
者大有逕庭矣間雜席縮紳幘皆公所營度闔垣岌業  
國之甘棠乎粵人喜祠龍驤亦唯曰廉而已人心路碑千古  
一日政事有堂公行且召雖然公以公明嚴密之政以寬平

敬簡之心用能就同列于功名罄參謀之忠實智畧才勇之  
據心悅誠服莫不以國士效報以一時得人宜書爵氏以俟  
來績是役也計度者史秉彝馮恕程督者劉  
宗信承直郎前廣州路總管府推官程準記

元海北廣東道肅政廉訪司署至元中因宋經略司署改建

廉訪使副使僉事皆列署於內分巡海北道列署於外後改

經歷司署案此在宋為柯述別建之經歷安撫廳在明為都

指揮使司署在今為巡撫署據黃通志阮

元廣州路總管府本宋經略司西園舊址至元十六年開設

達魯花赤總管同知府事治其經歷司在宋壯猷堂故址之

東經歷知事等皆其錄事司在府右達魯花赤錄事錄判案

今廣州府署即元總管府故址上

明廣東行中書省洪武初設於元宣慰使司都元帥府故址

先是元至正末為江西

行中書省據黃通志

明兩廣總督行臺在內城舊南海縣左天順四年都御史葉

盛建

國朝初移外城賣蔴街咸豐七年圯據金通志張府

謹案黃通志舊南海縣左之行臺作提督府行臺云

在城西即舊開元寺故址考舊開元寺即今元妙觀

阮通志列提督府行臺又列總督行臺偶有未照耳

明布政司清軍道署舊為海北道署在西甕街舊五羊驛址

天順三年清軍御史宋榮增修改為察院嘉靖四年更建右

布政清軍者居之據黃

明分守嶺南道署在郡西武安街宋轉運司署舊址上

明嶺西道署在小南門內嘉靖四年參政祝績改建于崔府

街即舊白衙案白衙即元大將白佐署據黃通志阮

廣州府志 卷八十四

古蹟畧二

五

謹案小南門內屬番禺

明分巡嶺南道署在郡南承宣街右洪武八年因館驛舊址創建後因巡撫居之永樂十二年僉事李約改建於其北舊

寶泉局嘉靖三年僉事祝品重修

據黃通志

明屯田鹽法道署在分守嶺南道東嘉靖元年建九年別建

鹽法道署於府城正南門外一里許即批驗所故址

謹案批驗所故址屬番禺

明兵備道署在鎮遠街東南即侯王廟故址嘉靖元年兵備副使王大用改建

明海道署在提學道西南

明海北道署在按察司門內東南

明糧儲道署在永豐倉內近察院後

俱同上

明嶺東道清軍道二署俱在按察司南惠福巷千秋寺故址

西南地案今鹽運使司署疑即其故址

據黃通志阮通志參修

明南察院行臺在城內正南門少西即舊總鎮太監府天順

改元都御史馬昂建

據黃通志

明巡按西察院行臺在郡西朝天街洪武三年建即國慶寺

故址萬曆二十五年御史劉會改為義倉太監李鳳改為稅

課局復改為崇正書院今圯

據黃通志南海志參修

明清軍廳在郡治西嘉靖六年知府范祿重建

據黃通志

明督捕廳在清風橋東南

明管糧廳在永豐倉內

明理刑廳在府儀門西

明市舶提舉司署在府城外西南一里即宋市舶亭海山樓

故址洪武初建解次有水心亭前有觀瀾亭俱同上

國朝舊平南王府在內城惠愛坊明為都使司署今為巡撫

署據金通志

舊靖南王府在內城貞烈坊康熙二十年改為將軍府據郝通志

巡撫舊署在外城靖海門內康熙十三年移於清水濠今為

民居據張府志

謹案清水濠屬番禺

提督學政舊署

國朝初在外城天平街又移在內城育賢坊今改為關帝廟

據阮通志

謹案育賢坊屬番禺

布政使司署

國朝初在外城賣蔴街據郝通志

分巡鹽驛舊署在鹽倉街據金通志

廣南韶連道廢署在內城西湖街即廣州右衛署改據張府志

鹽課市舶提舉司廢署在外城大新街遷承宣街據金通志

謹案阮通志云 國朝併鹽課提舉為一司故祇設

一署今裁

按察司經歷舊署一在早亨坊南海縣署後一在布政司後

街即廣州後衛廢址據南海志

鹽運司庫大使舊署在內城小馬站據郝通志

按察司知事廢署在鹽倉街據金通志

按察司照磨舊署在起雲里今為南海倉據南海志

舊都指揮使司署在內城惠愛坊即今巡撫署明洪武元年

因元廉訪司建

國朝初移外城新橋市又遷內城桂香街今裁為糧驛道署

據金通志郝

都指揮經歷司廢署在內城觀蓮街

舊廣州右衛署在西湖街後為廣南韶連道署亦廢

據金通志郝

廣州前衛廢署在惠愛坊

防捕同知舊署在府署西移外城清水濠又遷局前街今亦

圮

據郝通志謹案清水濠局前街俱屬番禺

廣糧通判舊署在府署西移外城水母灣又移內城西湖街

圮為西湖倉又移外城王子巷今亦圮

據張府志阮通志采訪冊參修

謹案水母灣亦屬番禺

府經歷舊署在府署內東

南海縣舊署一在府城北蘭湖隋開皇十年創一在子城內

元時遷建一在內城元妙觀左明洪武二年建一在太平門

內

國朝初建

據黃通志金通志參修縣丞舊署在早亨坊

典史舊署在縣署內

據金通志江浦巡檢舊署在縣西南明洪武三年建

三江巡檢舊署在縣西北豐湖堡明洪武三年建

五斗口巡檢舊署在縣南佛山鎮明景泰三年建

黃鼎巡檢舊署在縣西南西隆堡甯口村即舊黃鼎寨

鶯岡都司舊署即今佛岡同知署據南海志

來遠廢驛宋紹興六年改奉真觀為之以備招徠諸國貢使

據繫年要錄

懷遠廢驛在府城西據郝通志

官窰廢驛在府城西金利堡同上

舊府學一在西城番市通衢即

孔子廟故址宋慶厯中建一在郡東南隅皇祐二年經畧使

田瑜建一在國慶寺東熙甯元年經畧使張田徙建據金通志

謹案皇祐二年熙甯元年所建之舊府學俱屬番禺

崇正書院在西湖故址舊為濂溪祠正德二年提學副使林

廷玉增闢為之嘉靖二年魏校遷祠粵秀山下據黃通志

矩洲書院在西門外明黃衷建據泰泉集黃佐有記不錄

鎮海書院在粵秀山下明王漸遠建據番禺志

雲谷書院在西樵山上明湛若水建據大清一統志

大科書院在西樵湛甘泉講學之地據嶺海名勝記

石泉書院在西樵明方獻夫建有紫雲樓沛然堂據西樵遺稿方獻

夫有自記不錄

晦翁書院在西濠街即仁王寺魏校改建據南海志

迂岡書院在粵秀山下明倫以諒建

慎德書院在粵秀山麓明霍韜建俱同上

四峯書院在西樵寶林洞四峯中若盤谷霍文敏公宅焉有

崇禮堂前為環翠樓後為臥雲樓據歐虞部集嶺海名勝記參修

壽安院在舊威遠門外宋寶祐間提舉劉震孫建解庫于南

濠街設經費收其息以贍貧病者元季燬據黃通志



宋李昂英記天地之大德生而已所以無終窮生意不息而已凡物固形其數之自然慘舒其氣之使然彭殤椿菌固不容強齊亦各正性命焉大君位乎中妙贊化育分羣有司代天工要使生意流布充滿覆載間無一物不得其所國朝置福田院恤窮疾與天地同一好生常平倉專使領為凶荒疾疫設將以救民病而或者反以政事病民今天子軫遠方元進者老誼之曰賦過重疇吾司劉公倉氏節公一意推廣皇澤朕吾民歟追呼數惱吾民歟豪斷椎剝吾民鬱不吐歟聞一事繫戚休亟罷行不終日南人如解沉痾積痼豁然甦快無復愁嗟公猶以為未也廣山寬海鉅嶺霧散泄故無瘴土饒醲鮮細人恣屬厥亦易疾鰥寡孤獨之窮川淨陸負之賈馳書傳檄之價纒病于主家旅館則畏其累已迫遣之往往轉徙間巷雖受病本輕而不粒不劑且風且露困頓必僵廂邏又視為奇貨重誅求于死所為邦人害最大公惻然徼東坡在杭蓄錢糧作病坊故事乃相爽塏址于威遠門之內穹堂可容十人男東女西界限有別病無依者以告隨得入診必工藥必良食必精烹煎責兩童緇必恪日欲聞所苦重輕課醫之效募夫婦願俱庸者共凡役庖斯整福斯潔百爾器用色色具奄奄無聊賴之人忽處廣廈適眠餐所需如意頓使神醒氣伸居養所移半藥力已康強則資之歸脫不可療則斂瘞如法租收之田贏取之庫所入足以當所出畫為成規可行之悠久外峙崇門曰壽安顏其院因人情所欲也扶曳

來居無虛日全活甚眾人病之者既能居之安天病之者亦欲拯之生公之心無愧于兩間無負于吾君矣夫人生為三才之一仁人心也與天地心本不二如果核中有仁生意在焉惻隱其端不特發見於孺子將入井時雖草木禽獸之微萎瘁不得安其生亦安然動念病榻病榻馬病鴟杜詩韓筆且遺而况於民吾同胞乎苟其位其力可以利眾庶而呻吟叫呼在吾境若不聞良心安在哉公可以為仁人矣蓋元祐相國忠肅公其六世祖也家學源流有所自來公名震孫字長翁

渤海人

南漢廢宮在南海縣子城中五代史南漢世家劉氏有南宮大明昌華甘泉玩華秀華玉清太微諸宮凡數百不可勝記今盡湮廢鐵柱凡十二當時為乾和殿鑄者宋柯述取其四植於帥府正廳今藩司署鐵柱是也又有離宮在藥洲之上

據黃通志 大清一統志 嶺海名勝記 參修

南越王弟建德故宅在西城內吳虞翻移交州時所居有園池即今光孝寺樓元到廣州徘徊躑躅於翻宅故處哀咽悽

愴不能自勝

據吳萊南海古蹟記黃通志參修

翠微石室在西樵黃旗洞唐末詩人曹松寓此石室宛然若

存松嘗以顧渚法教人種茶山民至今以茶為業

據西樵游覽記

廖五經隱居在西樵山南麓明初廖謹讀書處解學士縉為

留題

同上

何潛故居陳白沙先生東曉序畧云何氏子居南海之濱更

名潛榜其居曰東曉

據白沙子集

樂堯庄在西樵廣朗洞湛文簡公與門人躬耕處有峻潔雙

瀑二亭

據嶺南名勝記西樵遊覽記參修

水簾房在西樵噴玉巖水簾之內飛瀑外蔽湛文簡公改為

西齋

烟霞隱居在西樵烟霞洞內湛文簡公卜居處也文簡始至

樵即築室於此中有棲霞崇經二樓茹芝正誼二堂又於隱

居之前左闢小朱明洞門以寓意羅浮右闢小朱陵洞門以

寓意衡嶽言其二洞相通也見周氏樵志

明湛若水小朱明洞天枕上詩云朱明小洞抱琴眠隻手還摩尺五天一曲沈寥人不和自歌自拍洪崖肩

大科隱居草廬在西樵大科峯西北龐弼卜居處中有雲居

見易二堂

俱同上

清泉精舍在郡城儒林坊明御史黎貴建一云在粵秀山麓

祕書黎民表建

據黃通志番禺志參修

天游精舍在府城西門外一里浮邱山之南明府尹陳錫建

據黃通志

玉泉精舍在西樵山明湛若水建

據張府志

天階精舍在西樵山

據甘泉集

鐵泉精舍在西樵山鄧順之讀書處李子長墓近在數武

府志思元堂集參修

明歐大任鐵泉精舍詩巖前舊是子雲家門掩飛泉一道斜石室竟藏高士傳山園猶種故侯瓜虎看丹竈千年火樹掛詩瓢幾度花小草尚慚曾出洞至今猿鳥悵烟霞

廣安宅宋瀉熙十六年運使管鑑兼提舉常平請于朝以沒

官田給仕宦子孫之落南者宅在崇報寺東宋末燬故址今

為南海縣

據黃通志

安樂廬宋嘉定四年經畧使廖德明即河泊衙故址創以待

旅候無歸者瀉祐二年經畧使方大琮通判左師呂取豪民

所侵地重修在城西繡衣坊景定二年經畧趙汝暨移至六

祖寺北

同上

尉佗樓在南粵王廟址

據文苑英華

唐許渾登尉佗樓詩劉項持兵鹿未窮自乘黃屋島夷中南來作尉任器力北向稱臣陸賈功簫鼓尚陳今世廟旌旗猶鎮昔時宮越人未必知虞舜一奏琴絃萬古風

清海軍樓宋元符二年柯公述所創折公彥質重建于紹興

二十年近歲又一再新矣

據南海百詠

拱北樓在布政司南即唐清海樓也其地本番禺二山之交

南漢劉龔削平之建雙闕其上宋瀉祐元年經畧司馬伋重

建元季燬洪武七年仍建後為藩府雙門

國朝順治康熙間再修咸豐七年復燬同治三年重建

據黃通志

張府志采訪冊參修

斗南樓在府治後城上東瞰扶胥西望靈洲南瞻珠海北倚

越臺森列萬象四望豁然宋建中靖國中經畧朱師復建

據黃通志

一統志大清

宋朱師復斗南樓詩危構參寥廓星躔耿北窗戰餘塵沒馬  
魚散月澄江遲暮憐孤客寬閑樂此邦坐中詩有待端欲受

誰降 明汪廣洋斗南樓詩二首久負煙霞想多為汗漫遊誰知嶺  
外客獨上斗南樓碧樹藏蠻邏清歌發蜚舟西山餘爽氣早

晚是新秋繁吹動秋聲天涼海氣清深杯引竹葉高枕傲  
桃笙晚樹依微出晴波嫩盪明醉來還自得身世在蓬瀛

越樓在闔閩中輪囷為一郡壯觀昔名共樂樓程師孟有詩

元大德六年元帥羅壁撤而新之改扁遠華樓元季燬

據南  
海百

詠黃通  
志參修

謹案阮通志於番禺縣別出遠華樓云舊名粵樓在

大市中高五丈許諸峯北峙鉅海南繞氣象雄偉為

南州冠宋紹興四年漕使王正言重建易名共樂元

大德中羅壁新之扁曰遠華本黃通志是則遠華樓

即越樓不必析而二也

詩隱樓宋黃鏞築

據文  
溪集 宋李昂英詩隱樓記畧吾友昭武黃君希聲工晚唐詩律遊

五羊獲登菊坡先生門因築舍于旁前為重樓俯坡山控越

岡萃堵坡童童如雲筆書空樹林遠近罨畫成圖碧瓦參差

玻璃千頃地據三城正四面平遠故宜樓字樓以詩隱其

志也菊坡起帥鄉部繡使彭公督師銜密畫往來其間迄清

亂畧閒則詩人用則國士潛雖伏矣亦孔之昭希聲自此不

得隱矣希聲名鏞其

詩有樵溪初藁云

海山樓在鎮南門外宋嘉祐中經畧魏炎建下即市舶亭唐

子西有登樓懷古詩宋時經畧安撫每於五月五日閱水軍

教習於其上嘗新荔元季燬

據南海百  
詠  
黃通志參修

宋陳與義詩萬船如鳧鷖一水如虛空此地接元氣壓以樓

觀雄我來自中州登臨眩冲融白波動南極蒼鬢承東風人

間浩落落海上春濛濛遠遊為兩眸豈恤勞我躬仙

人款吾語薄暮山葱蘢海清無屋氣彼固蓬萊宮

嶺南第一樓即禁鐘樓在坡山五仙祠前洪武七年行省參

知政事汪廣洋建十年改鑄禁鐘擊之聲聞十里

鎮海樓一名望海在府北城上明洪武初永嘉侯朱亮祖建樓五層高八丈許上矗雲漢俯極四陲山川形勝瞻顧在目嶺南奇觀此為最焉

國朝康熙二十五年李士楨重建據黃通志郝

明黎民表鎮海樓詩朱畫棟遍星河秋色蒼然隱薜蘿地轉青山開越井天懸綠水下牂牁憑欄漸覺清商冷顧影其如白髮何烏鳥有情成

張望浮雲西北晚來多李時行宿五層樓詩危樓凌碧落俯眺萬山秋明月樽前過銀河檻外流高歌振林木清夢落滄洲夜半聞笙鶴翻疑霄

漢遊國朝陳恭尹九日登鎮海樓詩清樽須醉曲欄前高閣臨秋一浩然五嶺北來峯在地九州南盡水浮天將開菊蕊黃如酒欲到松風響似泉白首重陽惟有笑未堪懷古問山川

玉山樓在粵秀山上明洪武初都指揮花英建以祀先賢高固楊孚董正羅威唐頌疎源陳臨王範黃恭九人據張府志

覽暉樓在仙湖里明大學士何吾騶故宅後

哇雨樓在粵秀山下明憲使王原相建

越望樓在藩司堂後今不存俱同上

控海樓在靈洲舊名棲霞閣明副使徐文溥更今名據黃通志

望氣樓在靈洲山晉郭璞至此占曰南海盛衣冠之氣後人

遂建茲樓據張府志

紫煙樓在浮邱山明萬歷間趙志泉建別有亭曰聽笙軒曰

挹袖堂曰大雅據郝通志粵中見聞參修

觀海樓在大觀橋今廢據黃通志張府志參修

遠志樓在西樵鐵泉峯下明嘉靖中鄧德昌建據張府志

敕書樓在城西龍津橋明光祿卿陳堂建

賜書樓在官祿巷宸翰樓在清甯里俱明方獻夫建俱同上

月華樓在鹽倉街有月泉井據嶺海名勝記

逍遙樓在城西龍津橋陳勳卿建據四留堂稿

鑑空閣在南海縣城上一在郡南五十里金利都崇福寺前

據大清一統黃通志參修

宋蘇軾鑑空閣詩明月本自明無心孰為境挂空如冰鑑寫此山河影吾觀大瀛海巨浸與天永九州居其間何異蛇盤鏡空水兩無質相照但耿耿矣云桂苑幕俗說皆可屏我遊鑑空閣缺月正淒冷黃子寒無衣對月句愈警借君方諸淚一沐管城穎誰言小叢林清絕冠五嶺

廣朗閣二妙閣俱在西樵山明湛若水建據張府志

鳴弦閣在西樵山明龐嵩建

棲霞閣在靈洲山明副使徐文溥改名控海樓俱同上

廣平堂唐宋璟都督廣州越俗始知棟宇張燕公嘗為遺愛

碑頌據南海百詠

報始堂在平地村宋元豐中黃氏建據黃通志

瑞芝堂在宋轉使司廳事後紹興三年六月臺門右柱產金芝一莖八葉三月再秀分莖至

十六葉五年復產金芝葉敷疊出一根二十一葉事備運使黃瑜記今不存同上

十賢堂在南海縣城內宋元祐中經畧張頤取前代賢牧滕

修吳隱之王琳宋璟盧奐李尚隱李勉孔戣盧鈞蕭昉十人

祀之蔣之奇知廣州以南海饒寶貨為吏者多貪聲之奇亦

取前世牧守有清節者吳隱之宋璟盧奐李勉等繪其像建

十賢堂以祀冀變其習據輿地紀勝宋史蔣之奇傳

欽賢堂據東坡集

宋蘇軾文張廣州與妹仁壽夫人書云廣州真珠香藥極有亦有閑錢但忝市舶使不欲效前人自汙爾有唐三百年惟宋璟盧奐李尚隱治廣以廉潔稱吾宋無聞焉方作欽賢堂繪古之清刺史日夕思仰之吾妹賢而知理必喜聞也潔廉哲人之細事也而古今邊患常生于貪守邊得廉吏則夷夏乂安豈細事哉張說作宋璟遺愛碑其文曰崑崙寶兮四海

財幾萬里兮歲一來書曰不寶異物則遠人格蓋致遠莫如廉使張公久於帥廣四海之物皆可致也元符三年七月十日

謹案阮通志云此疑即十賢堂所稱張廣州當是韻也

八賢堂在十賢堂東南瀉熙中經畧周自強取本朝賢牧潘

美向敏中余靖魏瓘邵奕陳世卿陳從易張頡立祠據輿地紀勝

元老壯猷堂宋建據文溪集

宋李昉英元老壯猷之堂記唐合四管疆西道而大府部自為東一當四廣莫可知水數千里旁午必趨離東下清海一尤勝者石柳子厚饗軍堂記謂治城西北陬泉池如在林壑彌望極顧莫究其往黃髮相傳即此地握穗騎羊之仙幻五石其前老夫臣故臺之山闖睥睨送青入巨石玲嶸倚池立如呀如偃如踣如舞疑海神揮巨靈擘崑崙鞭驅之來狗脚朕強以月峽珠池號石君終傲兀不肯得本朝名人題刻其間益重嘉定壬申有堂于池之北扁壯猷者架以脆栗成之蓮劣怒風雨殘剝之久而莫之葺帥方公大琮治一路視其

家據案勤文書至于日中辰無倦胸次有方壺處浩穰紛綸中益競爽從容意行偉境之倔奇而陋堂之非敵也命毀撤徙去除榛穢展其狹走舂錫起其卑規模巧出心匠匠伯巧圖位置不致秋毫之差千夫若其斤風爭奮銳騁拔棟隆密其釐立梁幽繆其虹跨椽嶸嶸瓦濺濺欲飛動入霄漢綺疏閣敞文絜緝綴躡數級而前楹又進數級而始堂廉藩以濬尺其從百有十而衡八十有四堂之北蒼筤玉立千箇風月無盡藏旁築梯城路二襟復屋而上有亭東曰連天觀閣凭虛引覽則遠峯疏烟霏翠冥濛濕晴空野闊溪長琉璃田渺千頃西曰先月樓臺于圓牖中見層樓擁喬木宛其桂影婆娑與廣寒宮隱映堂之南運石洲太湖甲品列于前七奇拔端凝可敬可友修廊翼如演迤紆以夷絲散屢東凡二石方橋聯絡之穹闕橫檻若長龍飲泮其鱗撐拒輪奐四面相繆碧渥形融交煜可鑒偶彩檄為舫舳鱗步上下水木芙蓉浮游出橋之南登對越亭則橋以北渠渠眺眺之屋盡成罨畫堂東北隅又廊繞燕寢之背過東園梅桂蘭菊所至而有隨物態着小齋短軒曲折丈室行高雅有壺翁橋叟趣妙巧無以踰之若夫曠垠衍沃登閣為奕則西園專美彷彿乎祕林天但未知海上三山玲瓏五雲之宇何如爾有大賓客則張其橫陳歌樂遞作堵妓圍棚優狡縹緲乎幔亭之集仙也軍有勞則竿歌樂遞作堵妓圍棚優狡縹緲乎幔亭之後先元帥戎服中坐諸將俯伏拜庭下跼蹐就位鼓磅礮然

士伍鞮鞶鎧扞俛聽號令無譁徐解綠沈黃間席地于廡行  
 以列甚整澠酒坻肉滂浪脂映莫不浹匝屬厭轟騰乎魏博  
 之歡雷也花時無禁邦人羣敖爭先帽桐之耄騎竹之稚韶  
 妝縵裳之麗遍繡臺館秋千蹴踘娉嬉老榕高柳邊雜遷乎  
 滁亭之遊人也公于財用愛惜錙粒出不妄凡可以新美炎  
 邦被無窮者則傾倒弗靳是役也最鉅且完固可堅久非苟  
 焉欲速成比厥費無算皆樽縮之贏乎出民未嘗勞其勞故  
 樂其樂停杯說軍府者咸曰不哉鏢乎州自漢初以來未有  
 此也于以抗颶母伏天吳瘴霧蜃氣一洗空之豈徒靡曼赫  
 鼓駭貽南人哉按州志蔣公之奇嘗隅城築石屏臺湮沒無  
 復遺蹟龔公茂良闢廣平堂來者潤色之常如新二公皆十  
 連兩地後之有人心者好惡則甚公公天粹其姿渾涵斂崖  
 角立朝特勁敢言清名厚德重一世天子久倚公峴嘔葭萌  
 調虞貉蠻治聲休其稱最行且入為明堂一柱是堂也將與  
 濬國之德威韓魏公之畫錦俱不朽額曰元老壯猷之堂沿  
 舊名而廣益之也客曰公其以方叔自况乎公曰不然夫一  
 之謂元先覺之謂老正大之謂壯而猷道也能正而一聞道  
 先乎人而可以為帥矣留南垂五年幸士民熟信而相親驗  
 之政揆之心粗無愧是道也嘗聞之諸老不敢不勉且有望  
 于後之主此堂者進此道以福此民也老以齒言膚矣客曰  
 唯清熙六年正月

師悟堂廖德明在南粵時立師悟堂刻朱熹家禮及程氏諸

書公餘延僚屬及諸生親為講說遠近化之宋史廖德明傳

世德堂在郡城西一百里綠潭堡亭子岡為宋司務羅寵建

據黃通志

明唐壁記畧初綠潭堡民多苦西北二江水患宋司務羅寵

力率鄉民築圩岸圍田千餘頃民甚德之後子孫多有顯者

因建堂于亭子岡名曰世德

粵會堂在石門明成化六年建同上

明胡榮粵會堂記畧距番禺上流四十里有山對峙曰石門  
 望之則東境之山自衡陽支分度嶺過昭梧而來下合曲江昌樂瀧滄  
 山亦自衡陽支分度桂嶺過昭梧而來下合曲江昌樂瀧滄  
 諸水由北而南鬱潯左右江端溪諸水由西而來俱經是門  
 而入于海蓋百粵山川之會也二廣總督韓公于茲地作堂  
 扁曰粵會凡出師巡部恆與同事官僚于斯商推政務夫天  
 地人之理自一而分萬者未也自萬而會一者本也故驗諸  
 人事未勝則雜而易于生亂本立則要而易以致理今因流  
 峙之會而議事機之會則理之本于一者諒亦融會于心焉  
 心以會理理以應事可謂得其要矣必將弭寇而寇息治民  
 而民安何政不立耶



秋澗草堂在歸德門內據南海志

粵洲草堂在粵秀山下明隱士黃畿讀書處嘉靖間巡按陳

大用於草堂前隙地建亦名泰泉精舍據黃通志張府志參修

嘉顯堂在仙湖里明大學何吾騶宅據張府志

喜雨堂在明都督府行署堂西都御史韓雍建後易名後樂

據黃通志

雁泉草堂在沙貝村明封戶部郎中陳鏊建同上

大雅堂在浮邱山郡人祀明趙志皋其中據嶺南文獻明葉春及有澱陽趙

公浮邱大雅堂記不錄

城西草堂四留堂毓秀堂廓處堂俱在城西第一舖明盧龍

雲建據四留堂稿

扇子亭李蟾妃事漢主得殊寵南海有蘇氏園雅擅幽勝漢

主攜蟾妃微行至此憩酌綠蕉中大書蕉葉曰扇子仙後人

構亭于上名扇子亭云據清異錄十國春秋參修

彙亭亭在朝天街宋漕貢進士陳宜家塾八世孫刑部主事

祐建據黃通志

朝亭在縣西十里戩船澳宋書泰始四年劉思道攻廣州刺

史羊希遣兵禦之于朝亭即此後為西候津亭明時為迎送

之所成化中都御史韓雍扁曰華節或以此即朝臺誤據大清

一統志

唐張九齡同王六履震廣州津亭曉望詩明發臨前渚寒來

淨遠空水紋天上碧海氣日邊紅景物紛為異人情賴此同

乘槎日有適非欲破長風又春江晚景詩江林皆秀發雲

日復相鮮征路那逢此春心亦渺然興來始自得佳處莫為

傳薄暮津亭下餘花滿客船

環翠亭在靈洲蘇東坡題據張府志

廣州府志

卷八十四

古蹟畧二

六

秀陰亭在宋轉運使司署運判黃朴建元季燬據黃通志

雲瀑亭在白雲洞口明趙志泉建據嶺南名勝記張府志參修

寄思亭在佛山堡明主事梁焯建據黃通志

敬亭在西樵山聚仙臺上明霍韜建從孫尚守修據郝通志

小西湖亭在西樵山吉水峯下明方獻夫建子藁修同上

味月亭據白沙子集

明陳獻章味月亭序畧成化丙午春正月五羊何子有載酒過白沙對月共飲延緣數夕告子曩夢遊仙甚適扁所居第為味月亭識夢境也願乞一言以歸予口占一絕云騎羊仙客去仙城風韻千年落杳冥羅浮道士來何處笑倒君家味

亭月

拜石亭在九曜石池旁士大夫多觴詠於此據嶺南名勝記

運籌亭在城西舊總督行臺堂東成化三年都御史韓雍建據黃通志

據黃通志

光霽亭在藥洲西明成化四年參政張瓚建據張府志

看竹亭在郡城詩書街明左通政叅議張詡所居據黃通志

玉虹亭飲澗亭俱在泰泉書院明黃佐建據張府志

吹笙亭在浮邱山明萬厯庚辰翰林侍讀趙志皋以忤宰執

出為粵副憲闢其地為紫烟樓晚沐堂又建浮邱葛洪二仙

祠及吹笙亭挹袖軒大雅堂鑿方池於其前為郡西游勝處

據郭通志粵中見聞參修

彼岸亭在縣西南對岸厚水村汪運光建據張府志

眾芳亭在城西第一舖盧龍雲建據南海志

劉王郊臺在城西硬步南漢時郊於其上舊志謂在郡北席

帽山者非也據黃通志

妙高臺在靈洲寶陀寺據張府志

謹案蘇東坡靈洲山詩靈洲山上寶陀寺白髮東坡  
又到來前世德雲今我是依稀猶記妙高臺據此則  
妙高臺由來久矣廣東新語載寶陀寺別有超然臺  
亦東坡遺蹟然黃通志及張府志皆不載考東坡集  
有超然臺記文云子移守膠西則非在粵東審矣

石屏臺在南海縣治西宋蔣之奇建有池百餘步池中列石  
其狀若屏即南漢明月峽玉液池也舊有含珠亭紫霞閣每  
端午令宮人競渡其間據大清一統志方輿勝覽黃通志參修

謹案石屏臺南海百詠黃通志俱作石屏堂

聚仙臺在西樵山據五朝詩選

見日臺西樵大科峯巔有古臺雞鳴見日明湛若水廓而新

之據郝通志

拄笏臺在西樵山據黃通志

越華館在縣西尉佗傍江構越華館以送陸賈因構朝臺據太平御覽太平寰宇記大清一統志參修

謹案阮通志云後人因寰宇記此文以朝臺為朝亭  
而 大清一統志援據宋書別有朝亭未可以越華

館當之

筆授軒卞山老人作記云昔制止鉢刺密諦彌伽釋迦對譯  
楞嚴經於此唐相國房融筆授之後蔣穎叔以筆授名其軒  
有石硯乃祁寮得于張季方家至今尚存軒今在光孝寺中  
蓋薊林向公子誣所復且有雲龕李公邴書榜及畫相國胡  
僧刻之于石據南海百詠

瀟灑軒在光孝寺宋知廣州蔣之奇建據黃通志

宋蔣之奇題詩一斛橫榔互獻酬禪房亦復種浮留憑師稍稍添松竹便可封為瀟灑侯

聽雨軒明初詩人王佐所居

據南園五先生詩選

明黃哲王彥舉聽雨軒詩輞川給事才且奇自我相親童冠時高談甚愛風雨夕世上閑愁都不知幾回共酌東軒裏正值瀟瀟滿人耳當窗滌筆寫黃庭涼聲散作鷺池水竹外淋漓可憐况復交遊盡飛酒落花殘先生擲筆向子笑如此官商真琵琶嘈嘈急如瀉先生醉坐銀燭低行雲入簾花遠迷嗜嗜屋角聞潮雞出門只見花成泥當時雄筆誰更好孫公狂歌真絕倒橫眠三日醉復醒夢見池塘生春草一別淒涼二十年關河風雨隔幽軒懷鄉淚逐燈花落隱几情忘春溜喧君入蓬萊獻三賦我踐泥塗走中路歸來相見頭總白座上逢人半新故西窗舊話誰與傳思君昨日空回船絲篴青筠重來訪莫厭連床中夜眠

劉王花塢即劉氏華林園在郡西六里名半塘有桃梅菱蓮

之屬

據輿地紀勝

昌華苑一名顯德園亦偽劉故址也在荔枝灣廣四十里袤

五十里又有芳華苑在千佛寺側桃花夾水二三里可以通

舟劉鋹設紅雲宴於此復有芳春園亦在城北今盡為民居

據南海百詠黃通志粵東見聞參修

荔園

據文苑英華未詳所在

唐曹松南海陪鄭司空遊荔園詩荔枝時節出旌旂南國名園盡興遊亂結羅紋照襟袖別含瓊露爽咽喉葉中新火欺寒食樹上丹砂勝錦洲他日為霖不將去也須圖畫取風流

西園在郡署

據武溪集

宋余靖寄題待制廣州西園詩善政徧修舉增完池館清地含春氣早月映暮潮生石有羣星象花多外國名與民同雉免邀客醉蓬瀛翰墨資吟興雲泉適野情鎮應持左蟹快欲繪長鯨積霽藏樓閣馴鷗識旆旌甘棠留美蔭高倚越王城

後樂園

據東莞集

明袁昌祚後樂園記畧光祿王君以伉直歸購圃于城西郭外浮邱之址因其故加意損益大增勝焉諸生欲以范文正象君也書曰後樂門徑窈窕嘉樹葱蒨構一小亭環以曲池曰一鑿亭亭西疊石為元覽臺臺北為修竹軒軒之東為茂林精舍

天字鎮在西樵山北元末盧寶善倡亂土人築鎮以守據南海志

西樵遊覽記

訶林淨社在光孝寺西廊明梁有譽黎民表歐大任輩結詩

社於此據張府志

浮邱詩社明萬歷中郭棐致仕歸與陳堂姚光泮張廷臣黃

士尹鄧時雨梁士楚陳履鄧于蕃袁昌祚楊瑞雲黃鏊陳大

猷王學會金節郭槃凡十六人關浮邱社以續南園據粵臺徵雅錄

西樵詩社嘉靖末霍勉齋主之四峯詩社萬歷間霍益方主

之據西樵遊覽記

藕花莊龍津別墅俱在城西龍津陳勳卿建據四留堂稿

番禺縣

明分守嶺南道署在城隍廟左天順中參政龔毅建扁曰紫

微分署其後改為海北道署據黃通志

明嶺東道署在番禺縣右嘉靖十一年參政徐乾建後虛此

以待使客而改清軍察院為嶺東道署

明清軍察院行臺在郡東南預備倉右即布政分司署嘉靖

四年御史楊銓改建後為分守嶺東道署

明鹽課提舉司署在府城東南府學之左洪武四年提舉薛

友諒建俱同上

國朝觀風整俗使廢署在內城倉邊街本左翼鎮署改今為

廣源局據郝通志張府志參修

按察使司署

國朝初在外城水母灣又在清水濠康熙八年建又在高第

街康熙十三年建據金通志

鹽院舊署在外城五仙門即今粵海關監督署

據郝通志

分巡廣南韶道舊署在外城清水濠今恭建

萬壽宮

據金通志南海志參修

布政司理問廢署在內城土地巷

據郝通志

按察司經歷舊署在布政司後街即廣州後衛廢址

據南海志

廣州左衛舊署在布政司後街即今鹽運司經歷署

據張府志

廣州後衛廢署在布政司後街後改按察司經歷署今亦圯

據金通志阮通志參修

廣州府署

國朝順治初在外城高第街

據金通志

番禺縣舊署在府城南五十里秦舊縣漢交州吳廣州皆治

於此後遷於城東即鹽倉唐復修建之長安三年別置番禺

縣於江南洲上宋皇祐間改建洲東紫泥巷

國朝初遷外城清水濠

據元和郡縣志黃通志張府志參修

謹案張府志云番禺縣宋熙甯二年改建紫泥巷與

黃通志又異

縣丞舊署在縣署內

據郝通志

典史舊署在縣署內

葵塘巡檢舊署在縣南逕口堡

俱同上

河泊所舊署在南門大巷口後遷天馬巷

據張府志

五仙廢驛在府城南官渡頭

謹案郝通志五仙作五羊

澁湖廢驛在府城北北田村

俱同上

謹案郝通志北田村作茅田村

舊番禺縣學初附郡庠西廡宋淳祐元年知縣諸葛珏建于縣東南五里前俯大江經畧使方大琮臨流築浴沂亭為士子遊息之所後燬據金通志

舊貢院在內城東北宋淳祐十年建元季燬明宣德元年建於西竺寺故址明季圯

國朝順治十一年因布政司署舊址為院康熙十四年移於外城清水濠據張府志

楊子宅在珠江南岸大洲漢議郎楊孚故宅常植河南五鬣松於宅畔冬雪盈樹人異其地目之曰河南唐許渾詩河畔雪飛楊子宅即此後城南有張瓊者掘得一甌刻云楊孝元宅瓊以為瑞自號南雪孝元字也據大清一統志張府志粵中見聞參修禺山書院舊在府學後宋嘉定間建梁百揆講學於此明為

鄉紳公議之所今為關帝廟碑刻猶存一在大東門內原名番禺義學

國朝雍正八年知縣龐嶼建嘉慶八年布政使康基田修改今名同治六年增建貢院併其地而拓之據阮通志番禺志采訪冊參修

白雲書院即白雲寺址明嘉靖間湛若水建據張府志天關書院在東門內湛若水建後為子孫居宅據番禺志

泰泉書院即白雲寺景泰寺故址明嘉靖黃佐建據張府志白山書院在北城內明嘉靖二十二年巡按御史陳儲秀為祭酒倫以訓建據番禺志

龍德書院在承恩里明萬曆八年知縣馮渠建

番山書院在清水濠康熙二十二年知縣李文浩建俱同上珠江義學在木牌頭康熙二十三年知縣劉茂溶建據張府志

城南樓據唐類函

陳江總秋曰登廣州城南樓詩秋城韻晚笛危榭引清風遠氣疑埋劍驚禽似避弓海樹一邊出山雲四面通野火初烟細新月半輪空塞外離羣鳥顏鬢早知蓬徒懷建業水復想洛陽宮不及孤飛雁獨在上林中

寶書樓在舊藩司左明祭酒黃佐建據矩洲集

紫薇樓一名粵望樓在藩司堂後久圯據黃通志張府志參修

樾森樓在沙灣鄉明光祿卿王漸遠講學處據張府志

雲淙海曙樓在白雲山據陳秋濤文集

集英樓在邑學內明宏治六年布政使馮俊建今廢據番禺志

奎翰樓在城東梁文康公祠儲厯事四朝所賜璽書數百函

其子孫構樓藏之據黃通志

明黎民表詩千仞丹梯俯四溟當時冠蓋盡仙靈綺窗倒納山雲白碧檻長涵海氣青天祿書猶題舊姓良常人已勒新銘酒醒忽憶西州路無那霜絃月下聽

飛閣在廣州府學宋淳祐四年經畧使方大琮建有文行忠

信四齋元至元燬據張府志

謹案張府志云府學紹聖三年知廣州章棻徙於城東南番山下殆即今學此閣建於淳祐在紹聖之後則當屬番禺矣

雲章閣在廣州府學元泰定元年憲使密蘭復建同上

海印閣在城東南沙洲明萬厯中建海印潛石也半在波際上有京觀樓雉堞四周與海珠浮邱相望隱隱若三台象焉

據郝通志粵中見聞參修

御書閣在聚龍岡西舊志有康與之順菴高宗御書扁榜有龍蛇飛舞之勢或謂學士李祐卿墓在此宋度宗嘗賜以恩袍草色動仙籍桂花香之句因名未知孰是據南海百詠張府志參修



蓮鬚閣晴眉閣俱在豪賢街明黎遂球讀書處據蓮鬚閣集

桂香閣在榨粉街贈員外郎屈襄建知州黎崇宣題據番禺志

瑞澤堂在官園巷堂有古檜雷轟為三父老相傳東坡南來

寓此信宿時有甘露降其上元末毀據黃通志

頤堂在郡署據武溪集

宋余靖寄題廣州田諫議頤堂詩退食公堂暇應無俗慮侵簾開雙燕影吏散百花陰海城逍遙境榮途淡泊心政成先

及民深

師吳堂據宋詩鈔

宋黃公度題師吳堂詩夫子賢堯舜老彭嘗竊比郊子及師襄下問曾不恥河汾一書生自謂聖復起西京投閣士敢與

孟軻齒古人取名廉後人取名侈誰知今人中復見古君子方君帥南越千載少倫擬燕居榜師吳一謙具四美隱之經

石門得名一杯水伯始萬事優可但清而已官曹服公德廉仁革貪鄙民俗陶公化淳厚勝姦宄蠻獠畏公威折垂制干

里老猾憚公明束手敢干紀三城有餘力一堂仍舊址裴帶自清閒賓僚多燕喜惟昔開元相勲業照青史胸蟠活國計

試手曾向此我公廊廟具勞外亦久矣尺一趣歸裝高蹈廣平軌

齊雲堂在白雲山宋時創久廢明嘉靖中重建據黃通志

宋索求題齊雲堂詩巍堂聳太清日暮倚前楹飛鳥却在下落霞相與平眼中窮百越掌上瞰三城送客一樽酒懷歸無

情限

安樂堂元至元間建為廣州軍士治病之所歲遣百戶一員

常省視之元季燬同上

天山草堂在河南古林莊明尚書何維柏建為懸車之所即

今何尚書祠據羊城古錄張府志參修

海雪堂在衛邊街鄜家祠內明中書舍人鄜露殉節處據番禺志

麗澤堂在清水濠番山書院康熙二十二年建同上

甘溪陸公亭在府城東北五里北山下吳刺史陸允築堤濬

水以便民汲民德之建亭溪上唐節度使盧鈞復加疏鑿以

濟舟楫更飾廣廈為踏青游覽所南漢廣之為甘泉苑中有

泛盃池濯足渠避暑亭即今薛薛水也據黃通志

宋方信孺詩甘溪依約舊城東陵谷遷移一夢中春晝踏青人不見桃榔老大木棉紅

餘慕亭在朝臺唐刺史李毗建凡使客舟楫避風雨者皆泊

此上同

浴日亭在扶胥鎮南海神廟之右小山屹立亭冠其巔前瞰

大海茫然無際雞鳴見日若凌倒景明洪武初平章廖永忠

易名拱日今仍名浴日據輿地紀勝黃通志大

宋蘇軾浴日亭詩劍氣崢嶸夜插天瑞光明滅到黃灣坐看

賜谷浮金暈遙想錢塘湧雪山已覺滄涼蘇病骨更煩沈滢

洗哀顏忽驚鳥動行人起飛上千峯紫翠間

楊萬里東廟浴日亭詩南海端為四海魁扶胥絕境信奇哉

日從若木梢頭轉潮到占城國裏回最愛五更紅浪拂忽吹

萬里紫雲開天公管領詩人眼銀漢星槎借一來

雲泉亭在白雲寺前據文溪集

番山亭在府學宋乾道三年經畧使周自強創榜曰九思明

景泰中重建

國朝雍正八年布政使王士俊按察使王文煒修據黃通志金通志郝

通志參修

浴沂亭在縣學宋淳祐間經畧使方大琮建據張府志

光風亭霽月亭在縣學明成化八年總督韓雍建今廢據番禺志

玉鳥亭在白雲山菖蒲澗據思元堂集

雙槐亭在番山之西明知縣黃瑜所居據黃通志

菊坡亭在蒲澗今改為佛殿同上

明張詡詩菊湖之上菊坡亭西望羅浮萬仞青到處事功唐李泌暮年風節漢嚴陵

卻金亭在郡治南前逼珠江明萬厯中客商為署鹽課司事

番禺令鄭陞建

據文海王學曾記

聚奎亭在縣學舊址易為啟聖祠明嘉靖十三年訓導郭偉

重建於祠前督學田汝成有記今圯

據番禺志

敬一亭在縣學崇聖祠後明嘉靖間建萬曆二十三年重修

今圯

同上

仰高亭在粵秀山鎮海樓前明嘉靖二十三年蔡經張岳等

建

據張岳碑記

恩光亭在聚龍岡黃畿墓前

據黃通志

雲淙邀瀑亭在白雲山明陳子壯建

據番禺志

凝紫亭在五羊驛前

據郝通志

擲硯亭在舊貢院右明順德李子長名孔脩初赴省試以搜

檢過嚴嘆曰此豈朝廷取以待士耶擲硯而去後人慕之因

建亭焉

據焚餘錄番禺志參修

朝臺在番禺縣東北昔尉佗初遇陸賈之處也裴氏廣州記

尉陀築朝臺以朝天子因岡作臺北面朝漢圓基千步直峭

百丈頂上三畝複道迴環委迤曲折朔望升拜名曰朝臺前

後刺史郡守遷除新至未嘗不乘車振履於焉逍遙治中姚

文式問答云朝臺在州東北三十里

元和郡縣志作在南海縣東北二十一里據

水經浪水注元和郡縣志太平寰宇記

唐許渾朝臺送客詩趙佗西拜已登壇馬援南征土宇寬越

國舊無唐印綬蠻鄉今有漢衣冠江雲帶雨秋偏熱海氣隨

風夏却寒嶺北歸人莫回首蓼花桃葉萬重灘

陸龜蒙朝漢臺詩萬里炎荒盡斗杓尉佗遺跡未全消城連

虎踞山圖麗路入龍編海舶遙江客魚歌衝白苻野人貪語

映紅蕉庭中必有君遷樹莫向空臺望漢朝

謹案朝臺所在 大清一統志定為番禺縣東北足

訂舊說之誤而黃通志以為在郡城西北硬步五里  
臺址纍纍尚存則屬諸南海說雖本於宋蔣之奇及  
毛漸之詩不知此特南漢郊臺而非南越朝臺也

越王臺在番禺縣北二里悟性寺後臺岡一名越井岡又謂  
之天井唐廣州司馬劉恂稱岡頭有古臺基即趙佗所築也  
臺北據山南臨小溪橫浦牂牁之水輻輳于其下連帥李玘  
於遺址構亭僕射鄭愚又加崇飾舊夾道蒔菊以待登高宋  
元間屢毀屢建經畧陳宗禮扁曰極高明後經畧劉應龍仍  
榜曰越王臺元宣慰使塔刺海顏曰拱極明永樂元年都指  
揮花英建觀音閣於其上後改為名德祠

修參  
唐宋之間登越王臺詩江上越王臺登高望幾回南溟天外  
合北戶日邊開地濕烟常起山晴雨半來冬花采盧橘夏果

摘楊梅跡類虞翻枉人非陸賈

才歸心不可見白髮重相催

李羣玉廣州陪諒公從叔越臺讌集詩一逕松梢踏石梯步

窮身在白雲西日街赤浪金車沒天拂滄溟翠笠低高鳥雙

飛驚晚旆長風萬里卷秋聲玉鉤

掛海笙歌合朱履三千半似泥

許渾登越王臺詩月流高岫宿雲開萬里歸心獨上來河畔

雪飛楊子宅海邊花發越王臺瀧分桂嶺魚難過瘴近衡陽

雁却回鄉信漸稀人漸

老只應頻向北枝梅

宋唐庚登越王臺詩崎嶇走上方浩蕩耿秋光臺上經繆女

江天入夜郎華夸凭檻遠興發引杯長泉脈來何處中含定

香

文天祥越王臺詩登臨我向亂離來落落千年一越臺春事

暗隨流水去潮聲空逐暮天迴烟橫古道行人少月墮荒村

鬼哭哀莫作楚囚愁絕

看舊家歌舞此街盃

元許有壬越王臺詩問俗來南海休期上越臺際天迷蒼莽

拔地起崔巍五管衣冠府連城錦繡堆勢含蒲澗遠氣壓海

珠摧嶺嶠橫卷石滄溟瞰一杯人驚塵世隘鳥盡碧天迴霧

列番中國雲摩船上梳黑風鯨浪立紅氣蜃樓開市貨煩重

譯蠻琛盡九垓緬思推鬻子徒因島彝財下瀨纔分節雕甍

又劫灰我行求古蹟天遣度詩材長嘯魚龍駭遙歸鼓角催

遠遊心未已  
東北是蓬萊  
國朝梁佩蘭春日登越王臺詩獨尋春色上高臺宿霧重重  
瞻不開草木向遲風雨後江山曾閱霸王來百年心跡人如  
此萬里陽和氣欲回海水自  
飛雲自立世間豈少陸生才

謹案阮通志云尉佗有臺四越王朝漢外又有新興  
之白虎臺長樂之長樂臺粵中臺榭之古無踰此者

鶴舒臺在蒲澗安期生飛昇處

據張

宋康與之鶴舒臺詩白雲深鎖路崎嶇鶴去臺空景物殊山  
展翠屏連繡幕泉分清溜滴明珠道人祇問丹砂井隱客猶  
尋九節蒲試問葛仙仙  
去後至今遺跡事何如

得月臺在海珠寺宋李忠簡讀書處又謂之採花臺

據番

釣魚臺在泰泉上明王佐棄官歸自廣西時建

據黃

元覽臺

據泰

逍遙臺在沙灣南牌山下明光祿卿王漸遠建

據張

西臺在鹿步極扶胥之勝別駕李文卜築於此

據番

臥梅臺在越秀山上

同

雲泉山館在白雲濂泉間嘉慶十七年創建二十一年增修

今圯

據番

伊秉綬雲泉山館記白雲濂泉之間有宋蘇文忠公之遊跡  
焉嘉慶十七年香山黃培芳番禺張維屏黃喬松林伯桐陽  
春譚敬昭番禺段佩蘭南海孔繼勳脩復故蹟道士江本源  
黃明薰董其役拓勝境二十糜金錢若干次年閩人伊秉綬  
適來觀成迺為之記而系以銘銘曰盤谷樂獨崕  
臺懷開孰若雲泉南園興焉七字詩壇傳百千年  
翁方綱題雲泉山館詩廣州城外雲泉館張子索我雲泉詩  
白雲濂泉我未到八年吟望阻於斯遠追坡公訪信老自詩  
雲外泉出時近憶漁洋贈範納聽泉來叩安期祠百年前記  
蘇詩白石題亦勒崔公詞我別粵東金石遍竟未訪得蘇崔  
碑臨別白雲若迴盼又四十載詩夢馳詩翁逸客今選勝買  
地一攬雲泉奇依山臨礪結亭閣衆綠飛起珠江漪環碧之  
樓拜往詰得非菊泉書室基蘇崔精靈尙來往且莫遠問秦  
安期菖蒲笏竹雜潤翠木棉花風交荔枝他年蒲礪補山志  
月坡雲逕連軒池重立蘇崔題刻石漁洋詩或鑄並垂八年  
未到俗客耳我詩焉用疥壁為礪香正發紫含笑愧答優鉢

曇花師

臨清軒明詩人趙介所居據西菴集

明孫蕡臨清軒題壁詩思君幾日不得見特向城南問隱居巢鶴不驚流水靜一爐香炷數編書

廣恩館在府城內北一里後為開善寺今廢唐節度使孔戣

建以居南謫子孫流落不能自存者據黃通志

安期生石室在白雲山

白雲山房在白雲山太霞洞明典籍孫蕡建今廢

蘿山精舍在火村有泉甘冽名西泉即因山草堂

蓼水居高士黎密之居名人多留題詠

文水居在大塘街舉人黎崇勅讀書處俱同上

望春園在城南二里許偽劉故址也今為民居據大清一統志

南園在府城南二里中有抗風軒明初孫蕡黃哲王佐李德

趙介輩結詩社於此後廢為總鎮府花園嘉靖間改為大忠

祠自洪武初南園五先生開粵中一代風雅其後復有歐楨

伯梁公實黎惟敬李少偕吳蘭皋結社南園稱後五先生

國朝康熙二十二年番禺令李文浩即大忠祠東偏建復抗

風軒列五先生主而祀之乾隆二十八年督糧道熊譯祖允

郡人士之請詳准以後五先生附祀顏曰南園前後五先生

祠據黃通志明詩綜

明孫蕡南園詩社良讌集南園清夜遊修風振絡組華月照鴻駒高軒啟茂樹飛葢落遠洲移筵對白水列燭散林鳩

雅興殊未央旨酒詠思柔五華星光粲錦綵雲氣浮麗景不

可虛眾賓起相酬長吟間劇飲楚舞雜齊謳陵陽杏仙駕韓

衆非我儔聊為狗時序娛樂忘百憂又南園懷李仲修詩

幽獨據雅懷逍遙步南園繁卉耀陽德嘉禾秀春暄時暘燠

土膏流漸漲南川荃蘭揚朱英山馨炫文軒垂楊列曲渚鳴

鳥何關關展席芳醕陳開觴羣物妍顧瞻失儔侶高情寄所

宜馳思望遠人迴在伊洛瑤賢勞事會計日昃不遑安

聊復縱長吟引領希言何能此會合宴樂舒我顏

北園在小北門內舊貢院左明黃佐書院今廢

據張府志

湛家園在小北門內相傳為明湛若水遊憩之地後為民居

今其處尚以湛家園為街名經咸豐七年夷亂毀為平地

據采

訪冊

斐園在城南去南園里許明陳子壯建

據嶺南叢述

小雲林在城內明嘉靖中李待問所築有湛碧亭月波橋招

鶴亭馭風亭影山樓青霞精舍釣月臺諸構

據文海李待問自記

雲淙別墅在白雲山明崇禎中陳子壯以禮部侍郎抗疏歸

闕此與名流區懷瑞曾道唯高賚明黃聖年黎邦城謝長文

蘇興裔梁佑遠陳子升區懷年黎遂球共十二人吟詠其中

復修南園舊社

據粵臺微雅錄

洛墅在東門元運里內池十餘畝塘三口陳子壯園林有手

題扁字

據番禺志

東皋在東門外明御史陳子履建池亭樓閣山林隴畝悉具

為一時名園今廢

據張府志

番禺金錫齡分纂

番禺史悠履初校

番禺金佑基再校

番禺周熾皋三校

番禺史悠晉四校

廣州府志卷八十四終



廣州府志 卷之十四

古蹟

三

